



蓬山集
附錄

~16
2414
11



和
2414
11-11

經山集附錄卷一目錄
年譜



經山集

附錄卷一 目錄

一



經山集附錄卷一

年譜

正宗七年癸卯

二月十八日戌時公生于漢京南部會賢坊第

八年甲辰公二歲

九年乙巳公三歲

十年丙午公四歲

經紅疹○始學書

十一年丁未公五歲

十二年戊申公六歲

秋經痘膿甚重方煎人蔘忽有飛鵲掠罐而覆試
牛黃輒效○始作句曰杏木乙坐鳴長者稱有音
響精彩

十三年己酉公七歲

長者因事戒責公輒悔曰爲人子而爲父母之所
不欲非事親之道也終身無違

十四年庚戌公八歲

十五年辛亥公九歲

議政公每對客輒令從傍記之公之善於記注本
於此

十六年壬子公十歲

十七年癸丑公十一歲

赴庠製童蒙試狀元

十八年甲寅公十二歲

十九年乙卯公十三歲

冬夜讀書至五更占簷星爲候曉又起至平明掬
庭雪洗面以爲常

二十年丙辰公十四歲

始作科體詩

二十一年丁巳公十五歲

七月冠聘夫人金氏系江陵禮判啓洛女戶判翼
獻公華鎮孫翼獻公見公執其手曰他日必大顯
汝祖有厚德而位未稱其在汝乎每見輒以先輩
名碩言行勉之

二十二年戊午公十六歲

做賦表各體

二十三年己未公十七歲

二十四年庚申公十八歲

純祖元年辛酉公十九歲

做科策○赴式年試入格會試不利

二年壬戌公二十歲

十月赴嘉禮慶科庭試初試以表入格殿試登乙
科第二名○公始釋褐桐漁李公相璜曰君廊廟
器也須自護異日無忘吾言

三年癸亥公二十一歲

正月以假注書叅 太廟 景慕宮展謁 上願
承旨曰是誰也注視良久眷顧之恩始此○冬叅
召對命修進筵說蓋爲試記注才也後筵承褒教
○在堂后徐相公龍輔曰內蘊而精華外著遠大
器也勉之曰昔俞相公拓基爲習國朝故事求拜

假史三年後多需用君亦勿辭假官也

四年甲子公二十二歲

隸承文院權知副正字○直堂后夜宣饌政院教
與入直注書共之厥明入侍 上曰注書共饌乎
宣饌近臣御極後初有也仍命進叅召對

五年乙丑公二十三歲

正月 貞純大妃昇遐叅哭班○六月入注書薦
○冬赴漢學講坐不講例與諸文臣不講者同入
禁推傳旨 上命別捧而特原之異數也○蒙賜
新印大學類義

六年丙寅公二十四歲

正月以假注叅賓筵 上曰今日上下酬酌大關
義理必詳細記注也先是右相金達淳初筵請褒
贈 景慕宮代理時上書之朴致遠尹在謙以闡
先世子容諫之德原書已入丙申洗草 上命右
相進而覽之是日特行賓對下詢右相舉條領相
徐邁修遽稱爲忠愛旣而宰臣臺臣迭討右相甚
嚴臺疏有曰別兼春秋徐有恂圖改筵本幸賴注
書之據理不改蓋筵本 上曰右相初筵舉條領
左相見之乎領相姪有恂以爲左右相初筵舉條

領相見之乎而記注錯誤換改一字云云公堅拒不聽也領相書啓以爲自上所詢並舉左右相而筵說只書右字似是錯誤批曰予之所詢於卿者只舉金達淳事則今此左字云云之說何也卿聽瑩之致也命別兼拿問亦有公問啓之教公以實對○冬叅召對 上欲公之近前命翰注分左右講對時分史官自公始

七年丁卯公二十五歲

秋擬事變假注書 上召問承旨曰何擬是啣也對曰推鞫時峻選例也 上曰然乎遂點下○八

月叅翰林都堂會圈召試被選第二特教付檢閱○禁直應製御考高等輒蒙賜書○上御映花堂命承史閣臣射頒賜有差諸臣奉箋稱謝 上命板揭于映花堂及閣院而堂后揭者公所書也自是內苑陪射之會太液泛舟之宴每被宣召賞賚便蕃○晝講賜韓濩所書千字文及趙孟頫所書七月篇皆新印也

八年戊辰公二十六歲

四月奉安 正宗誌狀于江陵五臺山史庫兼行實錄曝曬是行觀楓嶽○因館規不就直特教陞

奉教旋命陞六○拜文臣兼宣傳官

九年己巳公二十七歲

入弘文館拜副修撰○講筵奏曰 殿下自恃聰明有一毫自多自聖之心則君德日孤臣等雖無似豈不勝於近習便嬖乎人主無友朋惟臣隣可與也○差平安道京試官○拜東學教授

十年庚午公二十八歲

正月拜修撰○二月拜副校理常叅奏曰大僚以言路爲奏言路云者非惟指袞躬闕失官師察采隨事規箴近來未有言某人某事當否某官某政

得失豈皆奉職無愆誠以緘默成習也此在上者導之使言也 上獎以切實○上臨後苑試武藝公在館直立草疏陳戒尾陳灾歲恤民之政上下凡數千言 上獎之曰真是鐵中錚錚之言也或以疏辭謂逼廟堂領揆金公載瓚曰言直矣我當知感又何引乎遂擬公檢詳時人兩題之○拜司諫院獻納○拜修撰○辟訓局從事官○拜校理○冬覲議政公于永柔縣任所

十一年辛未公二十九歲

六月特除司憲府持平使叅臺諫宣醞於德游堂

登筵則又除館職筵退後除副應教叅玉堂會筵
于資政殿講詩傳○差問事郎廳○拜掌令公在
館職時因大僚劄辭手書上疏自引 御筆書勿
辭察職之批于疏紙以下見者榮之○八月作永
柔觀行○十二月拜副校理承召還都聞關西土
賊犯嘉山卽日還發

十二年壬申公三十歲

正月抵永柔時土賊尚屯定州城民情繹騷公侍
側不離亂平還○拜軍資監正移拜應教○拜侍
講院弼善○差問禮官以 世子冊封勅也○拜

謝恩使書狀官以議政公降甲在開歲陳情蒙遞
十三年癸酉公三十一歲

拜司諫院司諫陳疏作永柔觀行○辟兵曹正郎
○圈拜 奎章閣直閣兼校書館校理以 正宗
御製校正印役也○拜兼弼善○差式年監試副
試○拜司僕正○上候在靜攝中一日之內講對
頻數公以臨御冷軒常膳違時宜體 殿宮惟憂
之念反復陳奏縷縷移時而始終注聽蓋素察公
之有忠悃也朴公周壽語公曰宮中皆以君爲忠
上有愆候焦慮形於色勉戒之奏人皆感歎乙未

公在史局申太史在植曰近見 純廟紀事靜攝
中惓惓陳勉者惟君一人吾特書諸策令後世知
有忠告之臣

十四年甲戌公三十二歲

拜司憲府執義○正宗御製印粧訖賜豹皮○四
月覲議政公于載寧郡任所○列聖御製合附本
訖印進書進通政階拜右副承旨○差檢校直閣
○十一月長子基世生○拜兵曹叅知

十五年乙亥公三十三歲

以閣臣登診筵勤講恤民縷縷陳勉○拜左副承

旨○拜侍講院輔德○十二月 惠慶宮薨逝叅
哭班

十六年丙子公三十四歲

二月詣江華外閣以 惠慶宮教命冊印陪來也
○四月覲議政公于順興府任所是行省東萊龍
宮先塋○閏六月仲子基季生○通擬禮曹叅議
是時官制之極掄也○拜右承旨

十七年丁丑公三十五歲

拜兼輔德

十八年戊寅公三十六歲

拜禮曹叅議○三月覲議政公于晉州牧任所○
拜左承旨

十九年己卯公三十七歲

拜吏曹叅議○拜兵曹叅知陞叅議○拜成均館
大司成時南相公公轍以銓泮復舊例通擬事筵
奏也○拜刑曹叅議○拜司諫院大司諫時臺疏
有外托陳勉內售挾雜諸臺至聲討公疏言彼疏
之可討在於挾雜若就句語之近似陳勉者斷成
罪案則是諫官陳勉而獲罪也諸臺事甚不審請
拜施譴罷批曰爾言明白曉人可謂得體○夏竦

女于尹周鎮時公以承旨連因特教持被納徵之
夕亦承命院直夜中特遷經三日又拜定蒙俯燭
也○五月季子基命生○秋湖西大水數千戶頽
滄特差公慰諭使公躬審面諭寧上德意仍啓陳
事宜十五條以聞廟堂稟施之民不知災○十月
王世子行嘉禮特差公禮房承旨進嘉善階行右
承旨轉左兼同知義禁府春秋館事都摠府副摠
管漢城府右尹公貴至列卿常侍寢必躬灑掃曰
事親豈使人爲乎未有私所賓至則雖寒節戶外
迎話議政公性峻嚴少許可而嘗語人曰是孝子

也○拜寧邊府使○通擬弘文館副提學以未下直守命啓請也

二十年庚辰公三十八歲

春陪兩親赴衙一日杖一枝太夫人諭曰吾不忍聞汝杖人聲公自是益務寬恕不用杖西人至今誦之

二十一年辛巳公三十九歲

三月 孝懿王后昇遐詣館所舉哀○本府有留防砲手設科試藝民馬兩庫之官用斂民者悉蠲減○抄特進官○秋平壤有沴氣 上命公禳災

差慰諭使公慰諭後馳啓陳撫恤之政因曰可言之會也卽具疏備陳西路結摠之濫斂穀簿之虛錄侵害於民者一切矯革之方與夫清任路振鄉綱收人才諸條以上 上採用之旣歸一路人鐫石繪像以頌之

二十二年壬午公四十歲

議政公年七十推恩加通政階公行養老宴又抄貧民之有父母者給米肉○拜承旨承騎駟下諭○拜都承旨○八月丁議政公憂○十月行襄禮于楊州馬山地

二十三年癸未公四十一歲

二十四年甲申公四十二歲

十月丁太夫人李氏憂○十二月自揚州緬奉于始興阿旺里坐甲之原夫人耐焉公受先大夫執手之遺托三言曰遠勢利養精力擇交遊公終身服膺至以三思扁之於丙廬常日監戒

二十五年乙酉公四十三歲

二十六年丙戌公四十四歲

制闕往處丙舍朝夕瞻依焉公居喪雖暑月不脫衰晝日亦不入內室六年哭奠必躬行未嘗闕參

謁墓課月一不廢也公仲父叅議公莅仁川携庖肉以勸之公不卽七叅議公曰制畢不食肉所執過矣公曰非不欲也胃弱不受久而後始進○拜漢城府左尹○拜兵曹叅判

二十七年丁亥公四十五歲

正月差備局堂上○薦拜全羅監司疏陳不洎三辭不赴○拜同知中樞府事○王世子代理以大諫叅賓對陳勉以敬天愛民○三月拜江原監司陳辭章批有任卿東藩意有在焉之教○七月元孫誕生公登布政門樓張樂飯士女○巡嶺東

二十八年戊子公四十六歲

狀陳道內諸瘼矯揉之方凡十二條而捐廩補弊亦非一二矣 世子特賜答以爲民爲公之心溢於言表褒之○三陟有久獄查釋疏寃○秋還拜吏曹叅判藝文館提學○拜同義禁同經筵○拜戶曹叅判○拜左副賓客○拜司譯院提調

二十九年己丑公四十七歲

拜 奎章閣直提學○拜大司諫上書請朴綺壽宥還時朴公以憲長論進饌時女伶事被竄旣而特宥而辭教過中公又上書直言之曰蓄怒於旣

原之後吝過於將改之際書八十三日承未安之批○八月北關警水會寧府使凡四改望而公以低望蒙點公力疾赴任十六社各置穀百石名曰民倉烏啼嶺田土許耕收稅付書院蠲海面城丁米布商稅○公以北關關防重地備虞甚疎著北畧擬議鐵北拾錄等篇公始之任民頑不畏刑公曰不教而罰亦虐也并去刑具諄諄誨諭如發蒙行之數月民乃感悅至於清商開市一以信義施之後三十餘年公之外弟李評事參鉉至會寧監市有清人來問公起居曰聞李公爲鄭大臣近戚

故來探

三十年庚寅公四十八歲

五月 王世子薨逝詣館所舉哀爲奔慰屢呈辭
單○九月擢陞資憲因領相南公公轍奏也○還
差備局堂上關東勾管○拜知經筵○賓對奏會
寧支差胡館宇修補及進排各種之歛於民者劃
給公穀耗又請蠲白徵稅千餘結並蒙允許○拜
司憲府大司憲

三十一年辛卯公四十九歲

差式年監試覆試試官○差館伴使 世孫冊封

勅也○拜 奎章閣提學○差生劃主試○拜都
摠管○拜刑曹判書○拜知中樞府事○拜右副
賓客○拜弘文館提學○拜知春秋○拜年貢正
使赴燕露宿溫井有詩云枕上星辰動床邊虎豹
眠楓臯金太史祖淳曰有大官氣像楓臯常呼以
少友爲作贊曰水則有龍山則有鳳惟經山子超
脫塵鞅入燕與太學士卓海帆秉恬尚書朱棊堂
爲弼蔣春坊立鏞帥翰林方蔚李秀才宗漣證交
唱酬有燕行錄

三十二年壬辰公五十歲

春還拜工曹判書兼宗簿寺提調○拜同知成均館事

三十三年癸巳公五十一歲

薦拜水原府留守歲饑俵田災書標分民民受均惠蠲官俸裕民食一境無顛連者○八月孫範朝生○冬移拜平安監司廟刻也

三十四年甲午公五十二歲

夏大雨義州漂頽戶二千博川六百餘戶防堰亦潰送褊裨慰撫分給錢米又劃財助之役不日而堰成本道軍餉穀慈母山城補城穀耗條不足歲

縮元穀辦劃二萬四千斛盡充元穀軍餉及支敕接使之需刵定規例永無濫歛之弊平壤府軍布城內外地稅戶役外城軍錢各廳舊債民庫加下並捐廩作穀取耗補斲買學田以勸儒業防戶歛以贍民窮補餼料以撫部屬其數亦以萬計驛站罷橫濫之例糴政著新釐之式民情大悅一省始息肩巡行列邑凡重囚之可疑者親查審問還營取積久陳案服念求生疏釋者甚衆有惟輕錄五冊○以俸餘乃儲白金五千兩於慈母山城以備緩急○十一月 純祖大王昇遐疏請因封前解

還批以此非道臣言私之時

憲宗元年乙未公五十三歲

夏北使臨境供億有條較恒例節省過半○大提學圈準點○六月上辭疏遞還西民之立石建祠殆無邑不然○差實錄纂修堂上○差東堂初試上試○兼造紙署提調○差關北句管○賓筵奏關西事四條並從之

二年丙申公五十四歲

正月拜兵曹判書○純祖 翼宗御製印進訖陞正憲階○拜內醫院提調○差實錄校正堂上○

差祔 廟尊崇都監提調○差 大王大妃樂章

文製述官

三年丁酉公五十五歲

尊崇禮成進崇政階以敦匠勞也○拜判義禁府事○差文科覆試上試○特除禮曹判書以德溫公主吉禮也禮成蒙錫馬○十月長子基世擢嘉禮慶科公以講官登筵基世以假注書入侍 上拈座目中假注書名字以示喜悅之意

四年戊戌公五十六歲

濬源殿影幘移摹告成以禮堂陪進永興還奏

本殿忠義守僕給料爲長番衛護○實錄印訖及
陪進勞連蒙錫馬○拜吏曹判書議薦學行人成
近默李敏行洪直弼李亮淵

五年己亥公五十七歲

以尹敬圭擬差齋郎故知事光顏子也光顏因撤
院時事被罪旋敘泮儒捲堂語逼政注公陳疏自
引批以是非之際宜欲一伸仍蒙遞翌日陳徑行
疏掌令李魯確疏斥詬辱至請竄配賜批嚴責而
遞其職公惶蹙往寓始興丙舍拜弘提禮判命嚴
飭上來又命金吾問備仍命捧入肅單又有不肅

命則不就寢之 慈教自夜至朝飭旨屢降又命
問啓公纔入院旋飭肅命公直退 上嚴教譴罷
又數月連降除飭公又不膺命投畀于南陽地浹
旬賜環寓丙舍特拜漢城判尹 慈教有曰近開
講筵宜卽上來公因縣道陳難冒之情賜隆批仍
飭明日肅命公又不膺又命金吾問備旋卽分揀
飭肅命如向日公又直退 慈教曰朝廷之上無
此一人誠亦狼狽素執竅堅前後敦飭都歸虛文
無可致之道則使之任行其志而已仍命遞尋拜
藝提藥提 慈教曰處義之道惟當稱停向日處

分自不免過中今番特除意有所在自政院嚴飭
牌招公又陳疏懇籲批又隆摯翌日以湯劑舉行
下飭教公不獲已赴院○拜內瞻寺提調

六年庚子公五十八歲

三月薦拜咸鏡監司再上章引前義力辭不許仍
施補外之典使之當日辭朝公赴任歲大荒發廩
賑饑民無捐瘠減還穀之虛留募耕陳田養士興
學祀賢恤隸之資并辦補定規咸興城內外戶錢
及橋樑之費蕩其舊歛備穀取耗以補民役道內
檢獄年久未決者並審理多傳生酌勘關北之紀

績頌惠一如西民秋大熟行男女老人宴又行鄉
飲鄉約是舉自寧邊始所至輒行

七年辛丑公五十九歲

正月拜都摠管還差備堂兼差湖南勾管○四月
枚卜拜議政府右議政 上遣史官諭曰卿之引
義不出三年于茲矣迺者爰立不待夢卜卿雖欲
復事遑巡不可得也卿是我 先朝初年已蒙簡
拔眷顧之恩自予胄筵久效輔導之誠者也卿以
韋平之閎世濟其美而重之端亮之姿明達之識
清儉之操謙約之行積之久而發之遲庶可以上

贊君德下匡世道而民與國有賴也卿其毋提往事勿拘故規公自銓部事後永劃自靖間雖怵迫嚴命一二承膺盖不得已也至承是命惶懼靡措迸出江郊至再諭陳疏畧曰旣負酬報之初心仍墜慎約之先規忝臣門戶敗臣一生行則羞影居則愧漏山藪雖恢而瑕垢無可藏之地星霜屢閱而滓穢無可湔之期厚造徒荷於曲費微諒已矢於永劃自分爲明時之棄物而已批曰一一條辨反恐有傷於事而蔽一言曰橫逾也橫逾之來事過則已又降別諭至第四疏曰質已虧矣名已僇

矣雖雷霆在上鈇鉞隨後蠢動無路只有死而已批有予小子無足與有爲之教至遣亞卿偕來公惶懼不敢偃處城闈之近胥罪於始興縣獄連下別諭不敢附對教曰敬禮自敬禮分義自分義命罷職領相趙公寅永奏曰人臣去就寧激無渝其在敬大臣之義尤當優容未幾復授相職公又疏申懇至再諭曰誠有所未盡禮有所未備予何惜非常之舉公驚惶詣金吾胥命上諭曰昨諭特收予方臨軒而待之公不敢終辭遂出肅上引見諭以太過公面陳血懇退復申籲賜優批勉之

○拜內醫院都提調○賓對公以勤學愛民容諫
恤獄陳勉 上并嘉納○拜司穽院都提調

八年壬寅公六十歲

拜 景慕宮御營廳都提調○因久旱行賓對奏
曰應天之道惟在懋實求直言以補闕遺飭長吏
以察幽隱疏冤枉以導和氣預儲積以濟窮乏此
非徒虛言而已著之施爲發之政令然後可以感
格于天而必得冥應矣比年以前則 殿下冲歲
也八域民庶之心正待今日 聖上自修之道無
加於前則其於八域之民望何哉 上爲之動容

○因病陳辭疏不許○冬陞拜左議政賓筵奏擇
守令嚴黜陟法司堂上另擇久任詞訟衙門勿致
癯曠雖值齋日亦爲獻讞無俾滯囚 上並可之
九年癸卯公六十一歲

筵陳以勤儉仁敬爲致壽之道敬天法祖愛民爲
福祿之基又以各宮屬之侵奪鄉民者另加痛禁
編配後親年滿七十者宜令宥還並奏行之○二
月回甲日 上遣掖隸詢起居賜蓼茸○以 健
陵 顯隆園親祭亞獻官蒙錫馬○連上辭疏遞
付判中樞府事○以 綏陵亞獻官賜豹皮○孝

顯王后喪笠制獻議○以 孝顯王后謚冊文製
進蒙錫馬

十年甲辰公六十二歲

陞付領中樞府事○以 元陵 景陵親祭亞獻
官蒙錫馬○禫後用樂獻議○差 王妃冊封嘉
禮正使雲石趙公寅永見公朝服渝甚新製送之
曰重其儀也公平居未嘗經意於服飾常衣大布
纈帛晚年家人進輕煖亦衣之時人謂公儉而不
自知也○製進 王妃冊封敕命文以正使製述
勞蒙賜鞍馬

十一年乙巳公六十三歲

南麓構一樓名曰花樹蓋做韋家故事也春秋選
日會族黨歲爲常○九月就養于長子成川任所
十二年丙午公六十四歲

正月 上以 綏陵遷奉專撥收議對以此事至
重且大詳審廣議而行之○二月自成川還奏關
西民事切急者三條并蒙允從○五月行 綏陵
遷奉禮 大王大妃緬服獻議以總服定自啓
陵至虞祭親行凡五次動駕公以藥院都相輒扈
駕一日道遇大雷雨水及馬腹公單騎馳入轎前

問候陪進衛內聞者稱得大臣體○以表石陰記
製述官蒙錫馬○診筵奏曰臣周旋講幄久矣以
勤學愛民四字始終懇懇今日不講明日不讀一
日二日光陰如流此過幾日聖籌過二十亦豈無
追悔之心乎 殿下深居九重民生之艱難疾苦
耳目所不及故認以已安而無憂然終歲勤苦不
給徭稅凍餒流徙無所控告日夜之所仰望者卽
殿下仁心愛恤也○上下教政院曰 中宮殿問
候依古例釐正蓋古例藥院曰次則口傳問安
當殿有事時及隆冬盛暑則啓辭而曰次啓辭及

大臣登筵時問候 純祖辛巳以後例也公以藥
提在本院曰行之已久儀節旣成不可遽議以啓
爭之與僚相再劄 上不從至曰次問候啓辭依
例書入命入侍 上教屢勤而愈爭執不已曰不
敢自本院遽議釐正 上引問安啓辭舉筆欲釐
正公高聲奏曰不當如此牽裾止之者三仍曰臣
大官也所言且是 殿下豈可不開納乎請亟下
啓辭之批 上曰筵退當下批及退只承 兩慈
殿問候批又啓劄屢爭之荐承嚴教翌年元朝賀
禮公陞殿問 兩慈殿氣候奏曰元朝也慶辰也

中宮殿氣候何如 上曰古例乎公以往例對
十三年丁未公六十五歲

差 正宗 純宗 翼宗三朝寶鑑校正大臣○
以 純宗大王上號玉冊文製述官賜豹皮公每
爲文後生末學有贊之者輒喜從之或疑改未必
勝公曰與其均也從人更佳

十四年戊申公六十六歲

以上號都監都提調賜鞍馬○秋拜領議政 上
諭以知卿取卿者卽惟曰經術文學之彌綸鎮安
也公疏辭者再至四諭曰卿是 先朝眷遇之臣

小子依毗之相人亦有言必曰世好歷數朝廷豈
有予與卿之世好乎公感激出膺乃陳戒曰人之
失學其病厭怠伏聞燕居常親簡編頻接近臣決
知我 殿下非厭學怠政但姑息成習志氣未立
不能移此心而加諸彼耳 上動容曰厭學怠政
儘是切中之言誠覺瞿然又以保嗇節用嚴科試
及痛禁各宮內寺之濫稅反復爲奏 上獎以憂
愛又奏薦善治守令之績著者隨窠甄用 上允
從之○以 綏陵親祭亞獻官蒙錫馬○以 御
製校閱閣臣蒙錫馬○三朝寶鑑印訖蒙鞍馬○

行進書儀以監法 先王六事陳勉曰典學勤政
愛民用人昭儉來諫也仍請自今課講寶鑑見一
政之美則必倣則之曰我 先王之政也聞一事
之善則必遵施之曰我 先王之事也國人必大
悅曰先王德化之盛復見於今日矣 上曰所陳
切至寧不銘念又奏平壤府糴穀多欠爲民邑瘼
弊請更張 上曰幾何公曰八萬七千餘矣 上
曰民弊至此何惜公穀特蕩之○十月因洗草宣
醞謝箋入侍 上示吏曹正郎柳宜貞疏蓋應旨
陳勉而至請宥金興根也 上曰是雖應旨覬覦

朝廷嘗試君父寧有是乎公曰向令在野臣盡言
無諱今有此嚴教則渠之所犯反爲小而 殿下
包容之德所損大矣 上曰設有句語中荒雜予
豈不包容乎雖覬覦嘗試求言陳疏則置而勿論
可乎公曰善則用之不善則置之亦何足傷古人
有言曰詢于芻蕘芻蕘之言豈盡善乎 上曰卿
於此謂以無傷苟如是國何以爲國乎公曰求言
而反罪之言路自此塞矣然則亦國何以爲國乎
是日天威震疊殿上侍者皆股栗公退胥金吾教
曰領相事不勝慨然堯曰宥之三臯陶曰殺之三

今日之事反是命罷職○十二月特敘付判中樞十五年己酉公六十七歲

五月 東朝寶甲載回 上特遣史官敦召連籲請勸賜溫批公赴賀班○六月 憲宗大王昇遐大王大妃垂簾定策命公奉迎 哲宗于沁都公奏曰此事重大敬書定策之教印御寶奉彩舉宜矣又令尚方進白袍帶陪衛儀節咸備焉翌日抵沁邸又翌日奉還詣 殯殿發哀即日冠御極依成宗故事也 慈聖曰宗社之付托有人公曰臣聞沁人言南山有瑞氣者三日渡甲津有彩虹起

於岸橫長江如橋見者異之此所謂國之將興必有禎祥者也又奏曰公除翌日開講卽 列聖朝故事惟 慈聖以宗社爲念 慈聖曰予婦人也所恃惟諸大臣耳公曰臣等敢不盡心夾輔皇明神宗冲年早起課讀晏則皇太后躬詣寢閣呼曰皇上起未講官已會太后教勉之勤如此故神宗得就學業矣時上下悲遑羣情憂懼公特奏禎祥以鎮之○七月公除翌日承候奏曰昔漢宣帝之迎立也欲天下民信悅而愛戴之則霍光曰皇曾孫在民間讀詩孝經論語盖帝王萬善必以讀書

爲先也以奉迎勞賜鞍馬○憲廟祝式獻議○八月復拜領議政再疏批下有不敢附對之教旋命收還 慈教又反復惻怛公不敢固辭乃出膺陳勉曰今 殿下春秋鼎盛聰明卓越而學工則無異冲歲此誠汲汲時也古之賢臣勉其君必曰近法祖宗臣請以耳目之所覩記詳陳之我 純祖大王敬天則燕居常存寅畏奉 先則攝享亦致心齋臨下則任老成而抑近習勤學則晝接夜訪樂而無倦雖靜攝之中手不釋卷愛民則蠲供蕩逋減徭恤窮節儉則內廚不供珍異御衣常經澣

濯常教曰儉者 列聖之家法也納諫則寬容翕受導以無諱常教曰君心先正始可聽言願 殿下以是法焉 慈聖謂 上曰言言是實留神諦聽又奏臺閣卽公議之所自出而與人主爭是非者也摧折督迫非聖代美事雖拂上意色容優待以重言官焉仍請敘罷削之五臺 慈聖曰大臣之言出於規諫五臺特敘○九月始開講筵公每詳繹旨義以開發之 上輒曰曉然○以 憲宗表石陰記製述官及請謚上謚下玄宮時勞並蒙鞍馬之典○以別迎慰使延冊封勅于弘濟院上

勅瑞常副勅和色本請見曰老大臣精力好矣且見令嗣御前侍從東坡詩所謂有子才如不羈馬知君心似後凋松想閣下人品家學爲東方盛○筵奏嚴考課擇守令仍請令秋曹課日會坐審查冤獄外道則究覈登聞引程子語曰君子於天下事無所不盡其忠議獄緩死最其大者東朝顧謂上曰此奏所當銘念公嘗曰揀得一分弊民受一分惠凡於生民切骨冤鬱之事猶恐不及不憚煩瀆陳奏必行如蕩逋還禁濫稅議刑獄終始惻怛懇勤者也

哲宗元年庚戌公六十八歲

引病再籲承未安批迸出城外上爲之收還三疏不允○拜扈衛大將○以仁陵親祭亞獻官蒙錫馬○御書天保詩八幅以下○以憲宗御製奉印閣臣蒙錫馬○道光皇帝訃勅來半年間上國冠蓋再我國專价七三道及松灣請劃之報日至公晝宵慮度左右拮据民不知迎送之苦○差憲宗實錄摠裁官○竇筵奏甲山三水民逋折米定爲分留恒摠關西添餉之均俵海西加作之無濫並令另飭仍誦宋太宗戒石銘曰爾俸爾

祿民膏民脂下民易虐上天難欺皇明及今中國
令刻揭縣衙蓋欲使天下守宰常日畏慎也 東
朝顧謂 上曰此豈但爲守宰之所戒人主亦當
爲戒也○陳七疏不許未幾趙公寅永復拜相公
以位次爲左議政又申懇獲準付領樞

二年辛亥公六十九歲

六月 真宗室祧遷當否獻議○拜祔廟尊崇都
監都提調訓局都提調○以兩都監提調及 徽
定殿玉冊文製迷官蒙錫馬○九月差嘉禮正使
禮成蒙錫馬○有鞫獄承委官之命原任替行罕
例也再辭不許府坐數日又劄免

三年壬子公七十歲

正月入耆社○四月爲耆老會於花樹樓會耆七
人徐判書俊輔年八十三尹判書致謙年八十一
安判書光直年七十七趙判書冀永李判書魯秉
年俱七十三李判書若愚年七十一公與金判樞
道喜年俱七十拈司馬溫公稀字韻聯書刻揭樓
楣○上行朝叅奏曰民事之急務有三一曰恤困
窮 英廟每下惻怛之教至有召見流民親賜糧
資二曰寬刑獄 正廟每於諸道囚案親加判付

自朝繼夜不知爲倦疏釋甚多三曰久任守令
純廟深察數易之弊爲吏者多久於任或仍任其
徑遞者謹將 三朝盛德而條陳之 上嘉納○
上引年疏 上手批不許仍具再疏不卽上或問
之公曰求退者當進而退也吾有何復進而必欲
退耶求退極致也吾欲欠此一節公嘗曰余釋褐
初心自思量曰事君當勿欺處事要正直自是凡
事來斯順應不求不避榮悴得失並不存心或有
問方在榮塗或有躁進心否公曰得一官輒以爲
分斯足矣躁進之心何自生乎○以 大王大妃

尊號玉寶書寫官蒙錫馬○文苑黼黻續編成命
公撰進跋文○以經筵禮繁而體嚴奏依皇明日
講儀行之 上命定講規以進講號稱日講○九
月 上齋御摛文院示 御製四句教曰欲揭院
卿文以記之公撰進○御書賜經山老人四大字
四年癸丑公七十一歲

以 大王大妃尊號玉寶書寫官賜豹皮○就養
于長子沁營任所時公仲子守白川郡暫就旋還
沁營公戒之曰爲官有五畏畏天畏君畏神明畏
祖先畏民也又戒曰凡爲害於民者債甚於貪貪

之害著而近債之害陰而遠勿以官物養吾體而不負官債是真養吾志也○上欲示意沁都設儒武應製命公主試○還奏沁都緩急可恃而財用不可不預畜自惠廳劄送木布以備遠圖蠲各庫舊債之爲沁民弊者并賜可又奏寧遠伯影堂李摠兵祠版在沁都請祀孫隨窠差營將守令○製進翼宗追上尊號玉冊文蒙錫馬○因廟奏被配人率眷議公引皇明律之所著式者請許之○冬叅日講賜御書楹帖一對

五年甲寅公七十二歲

五月就養于長子完營任所○十月還奏湖南事七條邑稅民瘼之矯整省恤也又奏泰仁贈祭酒李恒加贈賜諡長城前都事奇正鎮固窮讀書宜需用上並賜開允

六年乙卯公七十三歲

正月製進莊獻世子上尊號玉冊文賜豹皮○四月就養于仲子瑞興府任所五月還○與僚相柱下金公道喜菊軒李公憲球壺山朴公晦壽游觀金公興根心庵趙公斗淳荷屋金公左根作五八會于花樹樓盖酒饌無令過五器八器取真率

意也○八月 上幸 仁陵將行灤遷命諸大臣
並進公適患痢陳劄賜諒是日有吳赫因曹西洲
文集事陳悖疏舉一邊難安將陪扈者疏稟皆引
出因飭并叅公亦力疾赴及回 鑾下嚴教並刊
削疏稟人公以陳劄之在伊日上劄乞同勘批曰
大臣陳病誰爲不信○任憲大疏論伊日諸臣有
碍逼語公屏鄉廬三諭曰卿於 翼宗受知果何
如也卽日還第趁叅獻列至四諭有未安句語胥
命金吾 上還收開釋之公以進詣 綏陵爲奏
時 綏陵亦將遷奉也製進遷奉誌文賜豹皮陳
疏尋鄉○十月執義朴在皞疏申前說 上教曰
事端層激不可無調停因罷公不敘

七年丙辰公七十四歲

正月特敘付領中樞公疏陳永矢自靖之意批諭
隆摯至五諭以 慈候康復與大臣耆舊宣饌飾
喜勉公趨造公不敢辭仍拜藥院都相蓋勉留之
也○診筵奏曰嶺南海西漂頽戶二萬遘災之口
殆近十萬此往牒所無也其奠接撫恤之方一不
俯詢廟堂又無別飭彼失所扶携之民能不失望
而失恃乎○製進 仁陵表石陰託蒙錫馬

八年丁巳公七十五歲

正月 上教曰聞領府事回香在邇令梨園送二
等樂度支送宴需與內外衣資食物當日遣承旨
宣醞又特遣別兼春秋金炳弼存問又遣掖隸賜
蓼茸 內殿賜紬緞並及於夫人翌日進謝箋

上御便殿親受令子孫隨入 上曰卿位登台司
年踰七耄而琴瑟在御醮期載至三子俱以官俸
供歡觴豆卿家福祿世所罕比真國之嘉瑞也使
人人如卿之壽而得兼今日之會豈不盛哉予亦
望卿之壽而希卿之福矣仍賜 御書一紙曰此

卽諭卿者也其義好故親書以贈之公以祈祝陳
勉縷縷千百言爲奏命宣饌賜銀瓶銀杯○三月
夫人金氏卒○五月權窆于始興先兆乙坐○八
月 純元王后昇遐○純宗稱祖獻議○差 純
元王后追上尊號玉冊文製迷宮陳劄曰恭惟下
似當書以大行而上冊寶在於進謚冊之後則微
號謚號不具書未安請詢問大臣批曰卿之請詢
允合予意○十月特拜三都監摠護使○以製進
純元王后上號玉冊哀冊文及摠護使連蒙錫馬
九年戊午公七十六歲

二月行夫人完襄于親墓右甲坐原○拜 宗廟
署都提調○十月 元子誕生以藥院都相蒙鞍
馬豹皮奴婢田結子婿弟姪中初仕調用之恩典
十年己未公七十七歲

正月曾孫寅昇生○復拜領議政 上諭曰天命
人心眷顧漸嚮之會其所以絜綱振維藉卿賢德
屢辭而又屢諭遂出膺○賓筵奏嚴宮禁抑近習
又曰近來官職之特除已非美事至有外道監牧
各營各司校吏之因下教爲之者云閭里微賤者
之姓名何由上達乎又曰舟楫通行之處場市都

會之地莫不捧稅或稱宮差或稱京監侵索之弊
無所不至請並罷近年初出之稅又以懲貪墨奏
日期行懲勵之政自今債贓現發者則隨輕重限
年勿擬政望 上并從之○診筵陳養生說曰食
必欲淡色必欲遠蓋爲先防其悅口悅眼而制之
於未萌之前也 上嘉納○三月長孫範朝中增
廣文科公愼惕曰昔我陽坡公登第時水竹公左
相濟谷公畿伯至今盛道者也未紹德業而榮名
如此只添盈盛之懼○以 溫陵復 陵舊甲命
公攝行酌獻禮還奏國舅左議政慎守勤墓致祭

文簡公金淨文簡公朴祥祠版一體致祭後筵又請兩文簡祀孫初仕調用並可之○上辭章至再不許○竇對奏長湍竹山兩府之儲置穀與浦還或充代或蠲減又奏內需司以築泆田土等事具報本司輒曰從民願也爲民事也苟利於民營邑何不爲廟堂何不爲而獨付內司爲之乎內司寧失千頃之田四境不可有一夫之冤每以屑越濫雜之言至陳於至尊之前不畏法甚矣新溪田土之報有曰守令舉行駭妄白川築泆之報純是謊誣此習不可長兩番報司之內司官令攸司科治

上稱善開納○筵奏先正臣文成公李珥文簡公成渾祀孫家貧香火難繼兩祀孫守令差送以示朝家崇德象賢之意 上從之○憲宗世室獻議○冬連上三四疏不許又促行對奏革晉州結斂之弊劃補畿邑之儲置立嚴規以塞雙源並賜可十一年庚申公七十八歲

正月季子基命特拜洪川縣監竇筵奏曰臣子之特拜東邑出於惠養盛眷而臣子愚魯不勝憂悚因此而存仰奏者近來 殿下之所特除者何以俯燭其才能乎則不過爲其人施恩而不念民事

矣一付銓曹量才而慎擇焉 上動容稱善○連
上五六疏勉副付領樞○就養于洪川衙還奏本
縣還逋之爲瘼者弛之○診筵陳戒曰見今國勢
孤危嗣儲尙遲豈 殿下耽樂之時乎竊見醫書
男子真元充而精血固然後有身而生子必貴壽
願 殿下專心於此勿近侍女勿近杯酌以盡保
壽之道焉臣少而脆弱今八耋而猶能善食便步
盖由攝養而至此也 上曰予自今必行之質言
於卿時 玉度微愆旋復故公以是眷眷焉○拜
永禧殿軍器寺都提調

十二年辛酉公七十九歲

二月拜社稷署奉常寺都提調○五月復拜領議
政公三徹疏批諭愈隆至五諭遣禮判諭旨曰猶
復一向逡巡予何惜非常之舉公不敢晏處遂膺
命○賓筵奏會寧顯忠祠八義士中世俊之挺身
倡事吳允迪之罵賊不屈崔彥英許灌鄭餘慶尹
豈李希白吳遵禮之矢死奮力合施加褒之典宣
誥日致侑激厲北方之士 上從之○拜軍資監
都提調○連徹懇章批以日封十書萬無聽從之
理又命賓對奏清州有四大弊一曰官爲都結二

曰還耗加作三日輸稅牙倉四日稅太捧米都結
爲四弊之源仍爲革罷還耗折半作錢稅穀自本
州船運直納稅太分秩收捧勿與米相混依奏施
行○十月又疏辭許付領樞

十三年壬戌公八十歲

正月 上特遣左承旨尹滋惠宣諭曰領府事唱
名之星紀一周矣齒德俱邵福祿并臻歷事 四
朝旣康且寧况其科名之爲 純考舟梁慶科乎
尊年盛典何可不施於元老元輔回棹日當親授
几杖矣袍帽花蓋令各該司舉行衣資宴需令度

支厚送遣承旨宣醞賜一等樂庸賁稀有之盛事
以示優異之特禮滋惠公外孫也公陳辭劄批曰
尊年盛典已有 列朝故事而况卿祖先之再領
是賜乎時 上有愆度劄請收親授命 上勉從
之旋有仁政殿依親臨例爲之之教又令唱榜時
子孫中雖儒生童蒙皆入叅伊曰吏曹郎授紅牌
內資官頒彩錦花宣教官讀教文訖仍授几杖儀
仗鼓吹備焉樂工舞童衣紅衣前行道傍觀者如
堵遣都承旨徐衡淳宣醞 上御熙政堂親受謝
箋又令子孫扶入 上曰卿元輔也元老也享有

遐齡身康福完未知何修而致此卿向國斷斷之誠爲民懇懇之心予所倚毗朝野所欽歎者則天之所以佑善者有以也韶顏華髮進退中規人之上瑞朝廷之吉祥事也公奏曰臣厚蒙恩私年位此高今日所被曠前罕今以臣癯昏未知圖報之所矣昔齊景公見麥邱老人請獻其年又請使民無怨壽國之道臣今獻年於我 聖上又以壽國祝 上賜詩寵之詩曰寵宣杖几事光前三達如卿五福全內醞盈盈仙樂奏簪花重拂曲江筵賜內醞銀瓶銀杯命留公家○請暇行榮奠于始興

廣州果川揚州水原等地先塋如唱名時○就養于季子廣州貳衙任所○五月差 仁陵酌獻禮獻官以今年舟梁回甲而 純元聖母誕辰也○時三南繹騷迫逐長吏 上欲掾三政雙設釐整廳命諸大臣並差總裁官臨筵問罷還歸結便否以左相趙公斗淳請罷還穀每結斂錢二緡以代收耗也公奏曰還不可罷結不可斂 上命成節日屢辭不獲乃進釐整節目陳劄畧曰田軍兩條已爲知會不宜更論以釋政言之各道事情本自不齊其不甚弊者不須另加牽補只就三南焚苦

之瘼畧綽捄措仰答明命而已○慶科庭試讀券
官蒙點 上遣史官諭以今當回榜之年有此考
試誠罕有之事公辭以病○差三政捄弊策試讀
券官○十月復拜領議政時公在鄉廬連遣亞卿
正卿以敦迫之公輒引病請罪 上遽下躬迎之
教儀衛已備公震懍急詣金吾 上爲收成命有
臨軒以待之教公卽日出肅退而復辭不許○筵
奏以節攝勤學懇懇陳戒又書進一本以資時時
省覽 上曰忠愛溢於辭表○公建議還結兩政
復舊規便又以還逋爲厲民之本因諸道狀奏蠲

者摠幾萬石○十一月公唱名舊紀載屆特拜藥
院都相仍遣史官存問○陳疏辭相職至再不許
十四年癸亥公八十一歲

二月上第三疏又不許○賓筵奏文敬公李世弼
純學正道請施不祧贈都憲朴胤源文學踐履請
加贈易名 上可之○上第四疏承溫批○以
徽慶園遷 園都監都提調賜豹皮○燕京所來
升一史約編有宗系訛謬之句專价奏辨獲準還
公與廷僚請上尊號卽引 宣祖已行之例也差
坤殿上號樂章文製述官禮成並蒙錫馬○拜扈

衛大將○九月陳五疏遞付領樞○十二月 哲
宗大王昇遐 大王大妃垂簾定策命公爲院相
○上初封翼成君行冠禮 東朝書下三加祝辭
命公爲賓○上御極公奏曰人主之德卽敬天法
祖知人安民而爲政必本於學問不勤於學問則
何以成就德性明習治體乎

當宁元年甲子公八十二歲

正月公除後奏曰今日我 殿下歷年初服也孝
享 廟宮常以誠敬爲先深愛 慈殿常以養志
爲本昭儉德以裕財用開言路以補闕遺勤講學

乃修德之基也愛民生乃固本之道也○上初開
講筵奏曰 慈聖以孝經命先講欲使 殿下先
立其大本而治教之加於民國也○以 東朝樂
章文製述官 睿陵表石篆文書寫官連賜豹皮
○八月就養于季子華城貳衙任所

二年乙丑公八十三歲

四月 東朝下景福宮重建議奏曰凡役民之事
順其勢而紓其力民歡樂之則益有光於堂構之
業矣○六月哭仲子○差康寧殿上樑文製述官
劄辭老病不獲撰進賜豹皮○以 哲宗實錄總

裁官蒙錫馬

三年丙寅公八十四歲

春公有警候有時困倦則輒起試步侍者請少臥
休倦公曰臥更不穩少時治舉業偶晝寢覺而悔
曰不臥則不寢行之既久遂以爲性○二月製進
大王大妃加上尊號玉冊文賜豹皮○上行朝叅
公奏曰周成王冲年繼序而周召之眷眷祈祝者
乃在於歷年長遠曰不能誠于小民曰則知小人
之依蓋人主愛民之德克享天心則歷服無疆矣
上曰老成之言當服膺矣○以中宮殿冊妃玉

冊文製述官 哲宗追上尊號玉冊文製述官連

賜豹皮

四年丁卯公八十五歲

製進 大王大妃上尊號玉冊文賜豹皮○十一
月景福宮成 上御勤政殿陳賀奏曰是殿扁名
卽勤政也凡於省徭薄賦振匱恤窮之政朝行夕
施日以勤勤則福祿繇長矣

五年戊辰公八十六歲

春行季氏判書公回登禮少公十二歲公曰吾兄
弟位上相正卿壽耄又借老是吾父母至仁厚

德之發也泫然涕下○御書下老經山三大字○
閏四月復拜領議政 上諭之曰昔宋臣文彥博
九十作相咨以軍國事侍立終日其精力之康強
古今人豈相遠哉公以俟病間面懇爲對繼有賓
對命公登對只陳癯瘠狀退徹辭單至四又陳疏
畧曰早歲策名偏蒙 五聖朝恩遇上下七十年
間有除輒膺者誠以夷險向前爲萬一酬報矣今
臣請退非出於崇讓占便以精力之萬萬無勉強
之望也 上察其不可強下數十行溫批而勉副
付領中樞公之子若孫每入侍輒詢公起居至教

曰勲業克繼文翼翼憲兩公而壽考如文潞公福

祿如郭令公

六年己巳公八十七歲

正月以 大王大妃上尊號玉冊文製述官賜豹

皮○差三軍府都提調時原任大臣例兼新式也

七年庚午公八十八歲

八年辛未公八十九歲

正月 上展拜 儲慶宮遣史官存問以公所居

里近也諭以來候輦路令子孫挾扶而前曰卿今

立朝七十年乎仍特授長孫範朝嘉善秩公辭以

格外恩數 上曰勿過辭

九年壬申公九十歲

正月 上教曰領府事今年恰滿九耄矣國朝大官之享有此齡不過爲三數人誠稀有之上瑞也內外孫中間名初仕調用衣資食物例外加送遣史官存問○土詣 儲慶宮又遣史官問起居○是年 太祖大王開國八回甲也追上尊號差玉冊文製述官公以癯病辭不獲製進賜豹皮○秋駕過公所居里止輦問公起居○差 大殿上尊號玉冊文製述官劄辭不許

十年癸酉公九十一歲

正月 上教曰領府事今年爲九旬有一大官此齡國朝以來初有之盛也此奚但私門之慶抑亦爲明時之瑞宴需令度支從厚輸送設宴日遣承旨宣醞仍賜梨園樂今日先遣史官存問○又上辭製述官劄批許之○初三日考終于正寢公自前冬時有示憊之色而興居酬接如常是日曉以痰候微愆試步房闈時寒甚命開戶曰天寒白屋豈不矜惻乎命孫範朝曰眩矣安寢我正枕反席至中時而屬纊 上亟命太醫持藥物看病訃聞

上震悼撤朝下教曰領府事已酉奉迎大臣也貞亮之姿儉約之規濟之以文學才猷立朝七十有餘年齒爵之尊福祿之厚朝廷之所共欽誦也遽微逝單傷盡曷極賜東園副器成服日遣承旨致祭祿俸限三年輸送易名之典待謚坐議定國典當禮葬以公遺意三命不敢受特命至四而竟辭之令度支從優致贈至成服日遣承旨致祭又遣禮官閣屬官致祭○三月行葬禮于始興珠峰下甲坐原夫人墓右合封也

十一年甲戌

十二月 上特命不待狀議謚謚曰文忠勤學好問日文事君盡節曰忠

十三年丙子

墓表成

二十年癸未

八月 上駕幸 獻陵 仁陵時命遣地方官致

祭于公墓

二十一年甲申

墓誌成

三十二年乙未

文集成

經山集附錄卷一

經山集附錄卷二目錄

行狀

經山集

附錄卷一

目錄

一

經山集附錄卷二

朝鮮國大匡輔國崇祿大夫議政府領議政兼領
經筵弘文館藝文館春秋館觀象監事原任 奎
章閣提學文忠鄭公行狀

公姓鄭諱元容字善之號經山東萊人也自麗朝始
顯有諱穆官左僕射入我朝東萊君翼惠公諱蘭宗
有文武才著茂績生諱光弼領議政諡文翼配享
中宗廟庭爲己卯士林領袖再傳而諱惟吉典文衡
左議政號林塘生諱昌衍左議政號水竹生諱廣成
判書號濟谷生諱太和領議政諡翼憲配享 顯宗

廟庭號陽坡白軒李公銘于濟谷公之墓曰祖爲丞相父爲丞相又有首相爲子之長其奕世名德世莫與京翼憲公之子曰諱載岳蔭知敦寧寔公五世祖也高祖諱任先進士曾祖諱錫曾贈吏曹判書兩世潛德未顯蓋知敦寧公懼盈盛不喜榮名諸子若孫悉遵而守之此易所謂大有之後受之以謙夫謙者君子有終也識者知其後必復振祖諱啓淳大司諫贈左贊成文行爲士友所重考諱東晚號拙菴敦寧府都正贈領議政孝友謙約克世其德妣贈貞敬夫人龍仁李氏禮曹判書孝簡公諱崇祐女也淑哲有

閨範三世贈誥以公貴也公以 正宗癸卯二月十八日生公之生也屢有異夢自幼聰穎殊凡始學字時贊成公使集字成句公應之曰杏木乙坐鳴贊成公竒其有韻響六七歲人有言古人有不向北小遺者公聞而思之曰是爲北有關耶遂終身服行焉嘗因事受長者警責仍自語于心曰爲子而爲父母所不欲爲則非子道也自是洞屬承志無一事或違蓋敬君孝親之節已自孩提然也每冬夜冷室讀書至五鼓又曉起而讀朝以雪沃面輒灑風以乾之復讀如故自成課程十二三誦詩書及諸經又讀左氏春

秋甫成童嫻習功令文各體南霞李公勉求以駢儷名于世公就學焉至二日李公見公所作歎曰天才也爲之輟翰翼獻金公華鎮以孫女歸之曰必大貴矣每將先輩宏碩言行事爲語縷縷不置蓋所以期待而且勉之也 純祖壬戌擢庭試乙科癸亥始以假注書登邇列 上注視公良久已契昭融前後記注之啣凡二十有餘次若不膺則輒詢以何故若代望則或教以勿捧上直之夜有以宣饌寵之登筵之時有以善書褒之又屢詢年紀及世閥皆異數也甲子隸槐院乙丑薦注書丙寅以假注書叅賓筵先是

右相金達淳請褒贈 景慕宮代理時上書之朴致遠尹在謙 上意未安是日下詢領相徐邁修邁修遽稱爲忠愛旣而宰臣臺臣迭討右相甚嚴領相姪有恂時在翰院圖改一字於公所記注者公據理力拒確執不撓世皆稱之曰古史氏之遺也冬又以假注書叅召對 聖意欲公近前令翰注分左右召對時史官之分左右自公始丁卯選入藝文館爲檢閱每禁直應製親第甲乙屢蒙賜書戊辰特陞奉教旋命陞六拜文臣兼宣傳官己巳選入弘文館爲副修撰登講筵奏曰人主侮慢羣下傲然自尊則情志無

以上通矣 殿下天姿卓越若或自恃聰明有一毫
自多自聖之心則君德日孤豈止於阻隔而已哉君
上無朋友之交惟臣鄰可與也臣等雖無似豈不勝
於近習便嬖乎 上稱善秋差平安道京試官兼東
學教授庚午拜副校理時 上臨後苑試武藝公在
館直立草疏陳戒略曰試射較藝直一將臣職也廷
臣則罕接而此輩則頻御講筵則罕開而此舉則頻
行今者都憲疏所謂厭薄廷臣者誠直言也尾陳之
曰諸道百萬飢民嗷嗷願領晷刻難支而昨冬以來
廟籌多疎既無先事之備亦乏務實之惠惟以西路

之移錢作爲西江之斗水豈有賑政而以錢不以穀
者乎若無穀可貿則雖積錢如山民將奚食退而視
田野之間則有危亡不保之狀入而視朝著之上則
恬然晏然殆無猷爲民安得無怨而怨必有所歸矣
殿下冲年嗣服典學尤重咨治又急而例停反多於
講日一講只出於備例賓對常叅有名無實燕安悠
泛君臣否隔自古明良治理之世決無似此爻象此
臣所憂歎者也上下凡數千言反覆剴切字字衷赤
上獎之曰真是鐵中錚錚之言也或以疏辭謂逼廟
堂領相金公載瓚曰言直矣我當知感又何引乎時

論兩黷之拜司諫院獻納辟訓局從事官辛未特除
司憲府持平又特授副應教差問事郎廳又特除掌
令因常叅奏曰咨訪之下皆以無啓事退出六曹九
卿豈無一言一事之可建白者乎請并問備 上從
之旋移館啣有自劾事公手書疏陳之 上以御筆
賜溫批見者榮之覲行于永柔縣又拜館職承駟召
壬申除軍資監正移應教尋拜侍講院弼善差問禮
官還除書狀官陳情不赴癸酉拜司諫辟兵曹正郎
七月圈拜 奎章閣直閣爲 正宗御製校印役也
拜司僕寺正甲戌拜執義 御製印粧訖訖進通政階

拜右副承旨差檢校直閣旋除兵曹叅知乙亥以閣
臣登診筵奏曰大賑方張而無一言董勵之耕作方
始而無一言勸飭之民若曰所恃者惟吾君而全無
惻怛愛恤之心吾輩何以生云爾則 殿下何以辭
其責乎民背天怒而國不亡者未之有也臣每念王
室不覺中夜流涕 殿下何爲立視亂亡而不之救
乎 上命退公又奏曰 殿下近日留心於何事乎
怠政厭學虛拋光陰於燕閒幽獨之中臣等何以望
殿下爲聖君乎陞左副承旨拜輔德丙子通擬禮曹
叅議是職之爲極掄當時官制也丁丑兼輔德戊寅

拜禮議遷左承旨每於筵中命製進詩賦銘各體賞
賚便蕃且下詢曰爾家何住爾有子幾人天語溫諄
視之家人如也已卯拜吏曹叅議俄除承宣凡一職
之屢除者不能悉記而承宣受點前後爲五十有餘
於是年尤數數也輒因特教持被時公將迎婿方納
徵之夕亦承命院直夜中特遞經三日又拜寔蒙俯
燭也拜成均館大司成歷兵曹刑曹叅議旋移大司
諫有一臺疏潛售挾雜諸臺聲討請罪之不從公疏
請從諸臺之請且論臺啓句辭不審請并罷諸臺批
從之曰爾言明白可以曉人秋湖西有水警特差公

慰諭使公躬審面諭宣上德意繼而條陳事宜廟堂
稟施之於是民不知災十月 王世子行嘉禮以禮
房承旨進秩嘉善兼同知義禁府春秋館事都摠府
副摠管尋拜漢城府右尹出爲寧邊府使未辭陞通
擬副提學公甫下車凡爲瘼於民邑者靡不殫精釐
救而經遠之慮不獨在百里也視道內事如已分內
事而正有越封逾境不得行之歎辛巳秋平壤沴氣
肆行 上驚惕命公往祭以禳之仍兼慰諭使公慰
諭後馳啓陳撫恤之政因曰此吾可言之會也卽具
疏備陳西路結濫而侵於民倉虛而歛於民者一切

矯革之方與夫清任路振鄉綱收人才諸條以上
上採用之既歸一路人鑄石繪像而寓思焉凡公之
分符按節及其公私行所過有遺愛又其秉軛也利
澤之加於民者甚博以碑以祠遍於八路壬午以左
承旨召還陞拜知申八月丁議政公憂甲申十月遭
內艱連居喪一遵禮制丙戌冬服闋拜左尹兵曹叅
判其翌年正月差備局堂上薦爲全羅監司疏陳不
洎之慟三辭不赴拜同中樞通擬同經筵拜大司諫
時 世子代聽庶政因賓對以敬天愛民陳達承優
答擇差授江原監司辭不獲遂膺命便宜而捐廩陳
請而蠲稅其以一道十二條巨瘼論啓也 世子特
賜答以爲民爲公之心溢於言表褒之公以獄者民
命攸係也每按藩必先慮囚幽枉畢伸在任時通擬
吏曹叅判弘文館提學右副賓客戊子秋入爲亞銓
文任 世子召見詢道內事又詢世系官歷拜戶曹
叅判左副賓客司譯院提調己丑拜 奎章閣直提
學除諫長先是大司憲朴縉壽論進饌時女伶習儀
事被竄公上書請宥承未安之答居數日有一宰臣
居要地者從容訪公言睿意眷注公甚隆將朝夕柄
用時朴憲臣已特宥而辭教過中有欠禮使公惓惓

憂愛國耳忘身又上書直言之畧曰 邸下蓄怒於
既原之餘吝過於將改之際辭教一布大小憂歎巖
穴自好之士其肯願立於朝而盡心盡言乎書入十
三日不賜答及答令下辭旨又未安秋因水災多以
文宰差遣北關邑會會寧府使缺凡四改望竟授公
公不以吏事卑之愍窮而卹患察隱而除害十六社
各置穀百石名曰民倉以備灾荒民到今賴之庚寅
五月 王世子薨逝爲奔慰屢尋辭單九月廟稟擢
陞資憲階疏辭批曰一乃心力母孤厥簡差關東勾
管堂上拜知經筵大司憲辛卯差監試覆試上試及

生劃主試一心秉公士望翕然差 王世孫冊封勅
館伴使拜 奎章閣提學都摠管刑曹判書知中樞
兼知春秋弘文館提學以冬至正使赴燕壬辰還判
工曹兼宗簿寺提調同成均癸巳薦拜水原府留守
值歲不熟蠲官俸裕民食一境無捐瘠者俄遷平安
監司首釐軍餉之弊辦畫二萬四千斛以充之以至
軍錢之減城穀之添注措綜密無一遺筭若夫買學
田以勸儒教防戶歛以贍民窮補餼料以撫部屬者
皆取給於廩俸之節蓄其數亦以萬計臨還又以羨
餘者乃儲白金五千於慈城以備緩急絲毫不以私

甲午十一月 純祖昇遐疏請 因封前遞還批不
許翌年夏北使至供億有條較恒例省費者過半圈
文衡準點又疏懇納節許之差有司堂上知實錄事
轉差纂修堂上時 憲宗冲年御極日開進講以閣
臣之經賓客者更日登對公每進懇懇敷奏裨益弘
多提調造紙署勾管關北因賓對奏關西事四條并
允可丙申拜兵曹判書藝文提學知義禁內閣印進
純祖 翼宗御製陞正憲兼內醫院提調差實錄校
正堂上 東朝玉冊文製述官丁酉祔 廟尊崇禮
成以敦匠勞進階爲崇政拜判義禁府事差文科覆

試上試特除禮曹判書以德溫公主吉禮也蒙錫馬
戊戌以禮堂陪進永興 濬源殿移摹影幀還奏本
殿衛護之節仍請詢廟堂 慈教若日所奏得宜不
必更詢一依卿奏承錫馬之典以陪進勞也冬拜吏
曹判書議于大僚抄薦經學人成近默李敏行洪直
弼李亮淵京察後再疏辭未準己亥以尹敬圭擬齋
郎事泮儒捲堂有侵逼語公疏引批許解爲一伸也
掌令李魯確之疏出而極肆詬辱批以朝廷倚毗嚮
用之人論斷太過責之命遞臺職公惶蹙屏鄉廬未
幾而荐拜文苑春官之職命卽上來又命金吾問備

又命肅命繼又有不肅命則不就寢之教自夜至朝
飭旨屢降又令政院問啓公才詣院旋又教卽令肅
命公自院而直退 上下嚴教譴罷又數月連降除
旨繼而飭旨又降公又不膺 上又下嚴教命投畀
于南陽地纔浹旬特賜環又特敘拜判金吾又拜京
兆尹 慈聖有教若曰近開講筵卽今急且大之事
豈有過此者乎苟念到此宜卽上來出入講筵公因
縣道陳自畫之義隆批百有餘言開釋敦勉諄諄申
複仍飭明日肅命又連降嚴飭纔令問啓旋令肅命
之命又如向日公之直退亦又如向日 慈聖又教

若曰朝廷之上無此一人誠亦狼狽素執采堅所守
不變使前後敦飭極費思量者都歸於虛文無可致
之道則使之任行其志而已仍遞職尋拜藝文提學
及藥院提調 慈教又曰處義之道惟當稱停而以
太過也故向日處分自不免於過中今番特除意有
所在自政院嚴飭牌招公又疏陳惶隘狀批旨又隆
摯翌日以湯劑舉行事下飭教公不獲已赴藥院兼
內瞻寺提調庚子春薦拜咸鏡監司公引義如前筵
飭旣嚴簾教復宣公再上章力辭批諭有曰卿之引
義汔可休矣猶有未盡禮使之道乎仍問去就於政

院對以終無變動乃下嚴旨施以補外之典公懍惶
促登塗之任歲大荒公至則出俸錢爲粥而與餓者
盡五月而止顛連腫噲之民咸得以蘇焉又捐六千
穀悉採營府之所爲弊者行養老宴及鄉飲鄉約之
禮公之是舉也自寧邊所至輒行之蓋所以敦尙風
教也辛丑內移都摠管差湖南勾管堂上四月枚卜
拜議政府右議政諭曰卿之文學才猷特卿餘事耳
卿以韋平之閎世濟其美而重之端亮之姿明達之
識清儉之操謙約之行積之久而發之遲庶可以上
贊君德下匡世道而民與國有賴也公間雖怵迫嚴

教一二承膺而乍出旋入永矢自靖自承是命益復
懍蹙迸出江郊連上章悉暴情勢三批四諭辭旨杲
隆公又陳第四疏略曰臣質已虧矣名已僂矣明時
雖戀餘生已判發言永矢質神明而在傍捫腸寸結
雖九死而靡悔今臣去就雖雷霆在上鈇鉞隨後蠢
動無路只有死而已批旨若曰此固予涼德寡學不
足以致卿而亦由卿以予小子無足與有爲之故強
引不必引之義牢執不當執之事枝上生枝節上生
節至於如此耳遣亞卿命與偕來公以批旨中有不
敢承聞者隕越震迫胥罪于始興縣獄連下別諭不

敢附對教曰舉措轉益乖當事體轉益虧損是欲力
抗乎務勝乎敬禮自敬禮分義自分義仍命罷職未
幾特敘復授相職前批中未安字句特令抹去公又
疏申懇批畧曰卿之愬然何若是甚也在古名臣碩
德慘被僇辱而復出者可量哉必有權衡尺度惟
義是歸耳曷嘗如卿今日爲武又再諭有曰予何惜
非常之舉不以爲感回之道乎公驚惶詣金吾胥命
上遣承宣諭曰昨下諭旨特爲還收予方臨軒而待
之卽爲入來聽我面諭公至是不敢一向泯伏遂出
肅 上引見諭以引義太過公而陳血懇退復申籲

上以優批勉之拜內醫院都提調登賓筵首以勤學
愛民進奏曰天下之勢不進則退不治則亂今聖工
不趨於進則日見其退而已民生不躋於治則日就
於亂而已思之及此不覺歎息而流涕也其勉容諫
則曰從諫如不及納善如轉環哲辟治平之朝也以
過行爲諱以承順爲遜庸主衰亂之世也安危之分
卽判於此其勉恤獄則曰後世法家理官失入每多
於失出先儒有言曰居宮殿之中而思囹圄之苦處
清閒之地而念困阨之人宋制諸州十日一具囚帳
以聞近來道臣赴任三朔內具啓者絕罕雖或登聞

秋曹不卽審閱臣之北藩時啓本尚不覆奏其他可知苟係可寃而可生者因官司之怠慢抱寃叫呼於桎梏桁楊之下則豈不大可哀憐乎 上并嘉納拜司饗院都提調壬寅拜 景慕宮御營廳都提調夏旱甚公筵陳修德正事之實曰近年以前則聖籌冲歲之時也八域民庶之心正待今日及至今日聖工自修之道無加於前日其於八域之民望何哉 上爲之改容冬疏辭相職不許筵懇又不許因奏曰每以勤學仰勉前後不知爲幾遭而臣不能積誠感悟徒爲空言而止則是臣之罪也 殿下知臣言之爲

可而竟無採用之實則是 殿下之過也臣見 殿下之不採臣言而嚴畏緘默則是臣之罪益大而殿下之過益彰矣 上曰此實予過當益勉矣又以雖齋日亦爲議讞無或滯囚之意奏行之十一月陞拜左議政癸卯歲首筵陳以勤儉仁敬爲致壽之道敬天法祖愛民爲福祿之基又奏曰各宮屬之締結浮浪作虛券白地侵剝者宜痛禁之又曰獨身者編配後親年滿七十宜令宥還以伸孝理批賜可二月公之周甲日 上遣掖隸俯詢賜以蓼茸珍劑屢上章乞釋務遞付判中樞府事製進 孝顯王后諡冊

文錫馬甲辰陞付領中樞府事以 王妃冊封時嘉
禮正使及教命文製迷官又錫馬乙巳秋就養于長
子成川府任所丙午春有 綏陵遷奉議公卽還朝
奏關西民事切急者三條并蒙開允因 大王大妃
殿緬服議公引喪服記改葬總疏父爲長子亦同之
文獻議遂以總服定行五月行 遷陵禮自啓 陵
至虞祭凡五次動駕公以藥院都相輒陪扈一日路
上值大雷電以雨平陸成江公單騎馳入轎前問候
仍於衛內從邁聞者稱得大臣體以表石陰記製述
官又錫馬登診筵自書筵及勸講進講時事歷陳至

近日講筵之間斷有曰今年思昨年明年思今年則
亦豈無追悔之心乎申復懇摯冀格聖衷且請頻接
臣隣博詢民事 上稱善 上有教喉院曰 中宮
殿問候依古例釐正蓋非隆冬盛暑及 當殿有事
時則藥院日次只以口傳問安而啓辭與大僚登筵
時不爲問候卽 純廟辛巳以前古例也公時在藥
院日行之久矣已成儀節何敢遽爾遂再啓爭之又
與僚相再劄 上不從公亦不奉行卽命入對 上
教屢勤而公爭執不已 上以御手持問安啓辭舉
筆欲釐正公高聲奏曰不當如此矣豈有如此過中

之舉乎殆乎牽裾而止之者三仍曰臣大臣也所言
且是矣 殿下豈可不開納乎請亟下啓辭之批
上曰筵退後當卽下矣及退批旨只答兩 慈殿問
候公又啓又屢稟批教截嚴公又陳劄爭之益力批
教益嚴又下嚴教其翌月諸大臣登筵詢僉議而始
釐正至翌年元朝賀禮時公陞殿問兩 慈殿氣候
後奏曰元朝也慶辰也宜有 坤殿問候仍問 中
宮殿氣候 上曰前例何如公以古例對二月因特
旨 正宗 純祖 翼宗三朝寶鑑校正大臣差下
戊申特差上號都監都提調賜馬又以 純祖玉冊

文製述官賜豹皮秋拜領議政 上以宿德元老經
術文學寵諭之公再控辭章批曰卿疏所論魏丙姚
宋之才不借異代德量事功卿豈多讓至四諭有曰
卿是 先朝眷遇之臣小子倚毗之相人亦有言必
曰世好歷數朝廷豈有予與卿之世好乎公感恩遇
復起膺命乃陳戒曰凡人失學其病有二曰厭也曰
怠也伏聞燕居常親簡編頻接近臣決知我 殿下
非厭學怠政而姑息成習志氣未立不能移斯心加
諸彼耳今日 殿下之盛時也光陰如流德業未就
豈不可惜乎 上曰厭學怠政四字儘是切中之言

光陰如流德業未就云者誠覺瞿然可不服膺又以
重民牧擇法官慎起居節財用嚴科試諸條及痛禁
魚鹽堰泆之宮房所侵徵者反復爲奏 上獎以憂
愛并優納之 三朝寶鑑印役訖蒙鞍馬之賜行進
書儀仍以法 先王仰勉之其條有六也以平壤府
糶糶多欠折爲民邑瘠弊備陳請更張 上曰幾何
曰八萬七千餘矣 上曰民弊至此公穀有何惜乎
特蕩之冬 上於筵中出示一疏本卽吏曹正郎柳
宜貞之疏而勉聖學崇節儉及請宥金興根先是金
公被彈行遣也 上曰雖是應旨之疏覬覦朝廷嘗

試君父寧有如許臣分乎公曰向旣令在野臣咸言
得失毋有所諱而今若有嚴教則在 殿下包容之
德所損爲大矣 上曰只陳勉則設或句語荒雜予
豈不包容乎公曰善則用之不善則置之亦何足爲
傷古人有言曰詢于芻蕘芻蕘之說豈盡善而然乎
又曰臣雖萬萬不近似於見職而何可徒順 上旨
不敢言於所當言之地乎 上曰卿於此等事謂以
無傷苟如是國何以爲國乎公曰求言之時有此嚴
教則言路自此杜塞矣然則亦國何以爲國乎時天
威震疊屢下不敢聞之教殿上皆股栗公遂退胥于

金吾命罷職十二月特敘付判中樞己酉五月 東
朝寶甲載回 上特遣史官諭之以 東朝慶辰獻
賀之意公陳章請罪 上賜以溫批公赴賀班因奏
危蹙之情 上以一時過去之事不必更提諄諄爲
教公感惶而退六月 憲宗昇遐 東朝垂簾定策
命公奉迎于沁都潛邸公奏曰此事至爲重大精書
定策之教印御寶奉彩輦以進宜矣又令尚方製進
白袍白帶至於陪衛之節儀文咸備事在倉卒無所
闕遺焉越二日奉迎還當日 哲宗卽阼公簾前奏
曰今日大本急務無過於典學惟 慈聖以教誨勉

戒導成君德自任其責慥慥爲念焉臣又有一言仰
奏者古人論早諭太子之道曰左右前後罔非正人
此指朝臣而言也雖近習服事者亦必取正直之人
而今於一初尤宜慎擇矣公除翌日承候後奏曰昔
漢宣帝之迎立也欲天下民信悅而愛戴之則曰皇
曾孫在民間讀詩孝經論語可以承宗廟子萬姓蓋
帝王萬善必以讀書爲先也以奉迎勞賜鞍馬獻祝
式議畧曰帝王重統序而歷代已行則皆以天屬稱
焉今當兄 翼宗而禰 純廟惟於 大行大王則
唐宣宗時禮院祝式於敬文武但稱嗣皇帝臣某似

當爲可據之禮八月復拜元輔 上諭及 慈教繼
降有曰卿之名德器量可以鎮頽俗文學知慮可以
濟世務方今一初之會國事板蕩人心疑危此時此
任捨卿伊誰公再疏懇辭 上批有未安者諒公懍
蹙旋命收還 慈教又縷縷惻怛公不敢復辭遂登
對奏曰今 殿下春秋鼎盛學問則無異冲歲此誠
汲汲之時也若不於數年內以經以史先立根本則
將於國事何哉因以 純祖敬天奉先勤學愛民節
儉納諫之德條列詳陳勉以鑑法自是每侍講筵細
釋旨義以開發之 上輒曰曉然矣以 景陵表石

陰記製迷官請謚上謚時奉冊寶官贈哀冊贈玉帛
官長生殿都提調并蒙錫馬封典禮成華使見公異
之曰老大臣精力好矣且見公長子御前侍從書示
東坡詩有子才如不羈馬知君心似後凋松一聯曰
想知閣下人品家學實爲東方之盛郊館動駕時抱
狀鳴冤請查獄案者甚多公仍奏曰程子曰君子於
天下事無所不盡其忠而議獄緩死最其大者也議
者求其可原緩者求其可生一或有當伸而久繫者
則是豈聖人欽恤之意乎宜令秋堂課日會坐其審
克之亦飭外道一一究覈以聞 慈聖謂 主上曰

大臣此奏人主之所當銘念也又以嚴考課擇守令勤勤敷奏庚戌再以疏引病乞退批旨又未安公卽進城外上爲收其句語仍命行賓對公陳三疏苦懇批曰予言不再賓對俟卿病間又幾日促行賓對公不獲已進對特授扈衛大將上於講筵賜御書天保章八幅憲宗御製印役訖以閣臣錫馬道光皇帝訃勅至是時迎勅者再專价者七冠蓋來往道相逮也三路請劃之牘日以雲委而指顧取辦支調裕如又陳病至五疏優批不許仍命賓對進定差實錄摠裁官時湖南之寶昌關北之三甲西之孟東之

越畿之楊在在還穀之虧欠者巨則屢萬小猶屢千宮擁虛簿民受實害將至胥溺而俱焚於是次第論奏戢奸恤隱懲創之嚴蠲蕩之惠兩行而俱得宜且以諸路中最違糴法流毒生靈者箕則曰添餉海則曰加作完則曰移貿并痛陳其剝浚虐厲之狀條條另飭使無敢如前之爲仍曰宋太宗書爾俸爾祿民膏民脂下民易虐上天難欺四句頒諸天下郡國立於廳事之間謂之戒石銘皇明及今中國并揭于縣衙使守令常日畏慎也慈聖曰戒石之言人主亦當爲戒也上曰謹當銘念又奏曰日前分遣繡衣

云古規則牲邑也簡徒速行其蹤易秘且列邑未知所牲者爲何邑則舉皆惕息不敢爲非 慈聖然之連上第五六疏祈免又不許俄因趙公寅永權公敦仁復入中書以位次爲左議政又疏懇獲準以 真宗室祧遷當否詢議公獻議曰帝王家以統序爲代真宗至 憲宗爲五世而今 聖上卽 憲宗之嗣王也 憲宗祔廟之日 真宗以五世而祧禮之常也若以親序而言則以月祭之親行夾藏之制者情有所未安必有先儒定論之可援前代行典之可據然後始可議行兼訓練都監都提調以 祔廟尊崇

都監都提調及 徽定殿玉冊文製述官并錫馬差嘉禮正使又錫馬時有鞫獄承委官之命以原任替行是罕例也再劄辭批不從始赴坐數日又劄免壬子正月入耆社 上親總萬幾行朝叅公奏曰經筵法講體嚴而禮繁且例停居多臣意則依皇朝日講之法每朝講官詣閣入時刻平坐對卷簡其禮數嚴定規程無一日曠闕常有進就之效矣環域蒼生之望 殿下爲學者學所以爲政而政惟民事也第念民事之急務有三一曰恤窮惟我 英廟至有召見流民親賜糧資常教曰每念鄉谷窮民中夜不寐二

曰寬刑獄惟我 正廟自初元兢兢哀矜每諸道上
囚案卽命秋堂審理親加判付自朝至夜不倦疏釋
甚多民無冤者三曰久任守令惟我 純祖深察長
吏數易之爲民弊爲吏者久於任徑遞者仍其任利
澤自及於民謹將 三朝盛德有此條陳惟 聖明
繼述焉 上嘉納之後筵又以聖學仰勉承命議定
講規號曰日講上引年疏 上手批不許文苑黼黻
續編成承教撰進跋文秋 上因享事齋宿于摛文
院宣示御製詩仍教于公曰將揭院矣卿須作文以
爲記公遂撰進行召對并召時原任閣臣入對公登

筵 上親書下經山老人四大字以寵之癸丑夏就
長子榮養于沁都留營 上教曰予於沁都欲一示
意矣設儒武應製命公試取居數月還奏曰江都豈
尋常分司之比武宜令惠廳劃送蓄儲以爲遠圖
上允之又以各庫舊債之爲民弊仰奏 上曰予所
曾聞也仍命特蕩以 翼宗追上號玉冊文製述官
錫馬有鞫獄又承委官之命再劄免因領相金公左
根所奏有被配人率眷議公獻議曰凡罪無論島陸
酌施配典則朝家之待以不死者也使之室家相聚
資衣食救疾病者是哀矜體下之盛德至意也又况

皇律之所嘗定式者乎甲寅自長子完營任所就養
還建白湖南民事全州之軍布虛徵者請許以純錢
京船之稅米欠縮者請責之沙格長城穀之輸于漕
倉者請代捧以便之兩島民之失其漁業者請蠲歛
以惠之順天有七衙支調之弊則請減營將加里爲
南服關防之要則請作獨鎮並從之乙卯以 景慕
宮追上號玉冊文製述官賜豹皮八月 上將幸
仁陵時有灤遷議也命諸大臣並進公適患痢陳劄
言病狀批賜諒察是日因曹西洲文集事有吳赫悖
疏舉一邊盡難安將陪扈者以疏或以稟皆引入旋

承飭旨赴班回鑾後下責教并刊削公以陳劄之亦
在伊日上章乞同勘批曰大臣陳病誰爲不信其然
今此爲引誠過當前臺任憲大疏論向日刊削諸臣
而語逼公公屏退鄉廬恩諭屢宣開釋備摯至四諭
有未安之教胥命金吾 上卽賜反汗而又以恩言
諭之公還私次仍詣 綏陵時 綏陵亦將遷奉也
特拜內醫院都提調九月製進 綏陵遷奉誌文賜
豹皮以情地之一向危蹙陳章尋鄉溫批後又下別
諭有臺臣朴在韓疏申前說 上教曰事端層激不
可無調停仍施公以不敘之典丙辰正月特敘付領

中樞敦諭繼降至于再三公疏陳自靖之義承批後
又下再諭若曰今逢 慈候康復之辰與大臣耆耆
宣饌飾喜卿是耆德大臣不欲獲觀盛舉乎公不敢
復瀆遂趨承焉拜藥院都相再辭不許蓋勉留之也
以 仁陵遷奉表石陰記製述官錫馬丁巳正月
上教曰聞領府事回卷在邇事甚稀貴仍令梨園送
二等樂令度支送宴需與內外衣資食物當日遣承
旨宣醞又特遣別兼春秋金炳弼存問又遣掖屬賜
以蓼茸曰日氣清佳吉事順成予心亦以爲喜 內
殿緞紬之賜亦及於貞敬夫人公翌日進謝箋 上

便殿親受令子孫隨入面諭且親書以教之曰卿位
登台司年踰七耄而琴瑟在御醮期載至三子俱以
官俸供歡觴豆卿家福祿世所罕比真國之嘉瑞也
使人人如卿之壽而得兼今日之會豈不盛哉予亦
望卿之壽而希卿之福矣公以祈祝陳勉之語縷縷
千百言爲奏 上曰卿有言輒爲懇切無非向予至
誠也予心悅然開發矣命宣饌特賜銀瓶銀盃秋知
事李鶴秀疏請 純廟稱祖有詢議公獻議曰禮典
甚重其難其慎德則稱宗功則稱祖兩隆并美初無
差等在後王顯揚之誠表其著而加其號也 純考

深仁厚澤豐功丕烈邦人所常思崇報者也而禮貴
援據願廣詢而務合允當焉以 純元王后追上號
玉冊文及哀冊文製述官三都監摠護使連蒙錫馬
戊午兼 宗廟署都提調八月拜藥院都相 坤殿
有胎候設產室廳十月 元子誕生賜鞍馬豹皮奴
婢田結仍命授子婿弟姪中初仕己未重卜爲領議
政諭之曰天命人心眷顧蘄嚮之會其所以絜綱振
維一則藉卿賢德二則藉卿賢德屢辭而又屢諭遂
出膺奏曰嚴宮禁抑近習卽我朝家法也官職之多
有特除已非美事而至或有外道監牧各營各司校

吏之因下教爲之者云閭里微賤之流姓名何由上
達乎登診筵陳攝養之說曰養生者食必欲淡色必
欲遠先防其悅口悅眼而制之於欲萌之前也 上
嘉納公再陳病乞釋負隆批以勉之繼有賓對之命
進奏曰近見內需司以築泐事所報則件件是害民
之事而多經啓下者也以屑越濫雜之言陳說於至
尊之前者無嚴極矣至於白川則築浦口浸墊民田
其害爲尤甚司官科治差人刑配道伯與邑守并論
勘之後筵申禁堤堰濫稅曰內司寧失千頃之田四
境不可有一夫之冤又奏曰薦剡之法美矣令銓長

議廟堂薦已試有績者十人啓下後直差守令以責成效焉永恩府院君金公汶根疏請 憲宗世室之禮令賓廳會議公獻議曰 憲宗聰明睿智日月將就聖功神化治成制定此今日親賢樂利之類皆歌詠十五年德化之盛而於戲百世不可忘也臣猥忝三事躬奉盛德至善者尤詳於人不勝愴歎頌祝之至尋復乞解連上第三四疏批旨愈隆仍促行對公又陳病批令展期旋又促對公黽勉趨造釐革晉州之結斂劃補畿邑之儲置並立嚴規以塞弊源庚申特授公季子洪川縣監公奏曰日前臣子特拜東邑

想出惠養之眷而臣子愚魯不勝憂悚因此而有仰奏者近來 殿下之所特除者何以俯燭其才能乎不過爲其人施恩而不念民事矣此後則一付銓曹而慎擇焉 上稱善又曰守令之與道伯親避者法所當遞而具有治績者則可惜此後應避人宜以他道換差批曰可又連上第五六疏始獲免就養于季子洪川任所還奏本縣還逋之爲瘼甚急者請弛之上從之七月玉度微愆旋復公帶藥院啣請診後乃戒于 上曰凡傷生者酒與色也夏禹作訓曰色荒甘酒未或不亡今國勢孤危嗣儲尙遲災異荐臻小

民怨咨此豈 殿下逸豫耽樂之時乎臣竊見醫書
則男子真元充精血固然後有身而生子必壽若頻
御精損之後雖幸孕而順娩多未能養育此理必然
矣自今勿近侍女勿近盃酌節宣保嗇專心於求嗣
之方焉臣少也脆弱以酒色爲戒今至八耄善食便
步豈非攝養之効耶 上曰卿言懇懇如此予以自
今必行之意質言於卿九月兼 永禧殿軍器寺都
提調辛酉又拜領議政三疏固辭五諭轉摯有曰
三聖朝眷注禮遇於卿者果何如而獨不念古人追
先報今之義乎先君之思以勗寡人竊爲卿誦之至

有何惜非常之舉之教仍遣禮判敦召公以諭旨中
四字有不敢晏然遂膺命以遇灾求言反覆陳勉兼
社稷署奉常寺軍資監都提調時經勅行奏曰兩西
則民力方竭於策應三南則民勢重困於徵納北關
則民產多蕩於被灾此時若有科外之歛民何以支
保乎雖一包穀如有加作者則當論勘宜先事另飭
上俞受焉屢以癘癘控辭至三籲許之壬戌正月
上教曰領府事今年恰滿八耄而唱名之星紀又一
周矣齒德俱邵福祿并臻歷事 四朝旣康且寧此
則邦家之瑞也仍命回榜日當親授几杖矣帽袍華

蓋令各該司舉行衣資宴需令度支從厚輸送仍遣承旨宣醞賜一等樂賤臣滋息時適以左承旨在院中特命左承旨先將此意傳諭賤臣奉宣寵旨公以恩教萬萬惶感當陳辭劄爲奏翌日上劄批曰尊年盛典已有列朝故事而况卿祖先之再領是賜乎公又劄請收親授之命以上候有欠安節也批賜勉從放榜日子孫中雖儒生童蒙皆令隨入又遣史官諭曰今日善爲行禮乎謝箋時當召接矣三月上親受謝箋又令子孫并入上曰卿元輔也元老也享有遐齡唱名之星紀重回身其康強子孫逢吉

未知平日有何種德而然乎且卿向國斷斷之誠爲民懇懇之心予所倚毗朝野所欽歎者則諸福之集卽天所佑善者也几杖宣賜之日適因靜攝未克親授尙覺悵然于中今此登筵韶顏華髮進退中規人之上瑞也朝廷之吉祥盛事也賁飾昇平豈有愈於此者乎且御製詩親書以下公先陳獻年壽國之祝仍曰今番玉度平復實由皇天之眷顧祖宗之默佑也重病後百日調攝卽醫家通論也蓋外貌雖如常而榮衛久而始復也上以書紳服膺答之前席賜內醞又賜銀瓶銀盃時三南繹騷迫逐長吏上

惕然曰三政紊矣民之殿屎而致有此也籌司諸臣其議所以釐整之仍置一廳而名之曰釐整以諸大臣并差摠裁官 上臨筵問罷還歸結之便否蓋前月賓對左相趙公斗淳請罷還穀每結歛二緡錢是謂罷還歸結也公奏曰還不可罷結不可歛 上命成一節目以進公辭以昏耗 上屢教之又遣史官諭之公乃成進釐整節目劄畧曰田軍兩條已爲知會不宜更論而第以糴政言之各道事情本自不齊只就三南荼苦之瘼援古叅今畧綽捄措仰答明命而已冬公在鄉廬承復拜領相之命屢奉聖諭恩遇

曠絕連遣亞卿正卿以敦迫之公以爲癘疾甚矣籲章反涉暇豫遂從縣道只一陳而附對輒曰遄被譴罰而已 上遽下躬迎之教儀衛已備公震剝靡措急詣金吾胥罪 上爲收成命又諭以臨軒俟之公卽日出肅退而復辭承優批繼承賓對之命公以節攝勤學懇懇陳戒書進一本以資時時省覽 上曰忠愛有溢辭表公建議曰還結兩政復舊規便仍飭八路行之并與軍政而釐捄之俱有科條又以還穀逋簿是爲厲民之本耳乃慨然歎曰不治其本而於其末何哉遂周察諸道事狀隨輒奏蠲者摠幾萬石

恩歸于上惠究于下凡厥施措務行實政焉十一月
值公唱名回甲日特拜藥院都相仍遣史官存問因
咸興府亂民鬧三衙削道伯下本倖吏卽遣宰臣按
覈旋因按覈之啓啓曰三魁旣當場置辟而今所覈
者皆脅從也 上特施輕典又濟州民嘯聚數萬戕
人命逼官長亦遣使按覈兼察理罷該牧使職其亂
魁二人之已殲者外分等論奏并全活之癸亥筵陳
李文敬公世弼純學正道請施不祧 上從之公於
崇德象賢彰節義樹風聲之政惟恐其不亟如特差
牛溪栗谷兩先正祀孫守令職贈李公恒金公義貞

柳公沃朴公胤源謚加贈顯忠祠八義士官皆公前
後所建請而行之者也時燕京所來稗記有曰廿一
史約編其書有宗系訛謬者專价陳辨獲準還公與
羣僚請上尊號卽引 宣廟已行之禮也差 坤殿
樂章文製述官冊寶禮成蒙錫馬以 徽慶園遷園
都監都提調賜豹皮公以精力兩竭萬無以勾幹重
務每筵輒懇退輒以疏疏凡五上蒙恩遞十二月
哲宗昇遐 東朝特命公爲院相今 上初封翼成
君行冠禮 東朝書下三加祝命公爲賓公進前行
三加禮 上御極公奏曰人主之德卽敬天法祖知

人安民而爲政必本於學問苟非勤學好問則其何以成就德性明習治體乎公除後承候又以昭儉德開言路擇任良吏縷縷陳勉 上嘉納甲子差實錄摠裁官乙丑 慈聖俯詢景福宮重建事公奏曰列聖朝聖念之攸在也凡屬役民之事順其勢紓其力而民歡樂之則益有光於堂構之業矣以實錄摠裁官錫馬劄陳老病辭康寧殿上樑文製述官批不許乃撰進丙寅製進 東朝加上號玉冊文賜豹皮上親摠萬機行朝叅公奏曰昔周成冲年繼序周召之眷眷祈祝者在於歷年長遠而曰誠小民曰知小

人依蓋人主愛民之德克享天心則歷服無疆矣

上答以老成之言當服膺連承豹皮之賜以 坤殿

冊妃玉冊文及 哲宗追上號玉冊文製進也丁卯

以 東朝上號玉冊文製述官又領豹皮十一月

景福宮成 上移御勤政殿受賀公奏曰是殿扁名

卽勤政也凡於省徭薄賦賑匱恤窮之政朝行夕施

日以勤勤則景貺潛周福祿綿長矣戊辰御書下老

經山三大字奉揭堂壁閏四月復拜領議政 上引

古文彥博年九十作相事以諭之公才承一諭卽以

俟病間登席面陳爲對蓋於耄耋昏綴之中去就未

可論則初不欲張皇辭異徒煩恩禮也繼有賓對之命公登對只懇辭而退仍呈告至四遂入文字力辭上察其不可強賜溫批勉副付領中樞府事已巳以東朝上號玉冊文製述官賜豹皮差三軍府都提調新設也辛未正月 上展拜于 儲慶宮先遣史官問公近狀且諭以來待輦路得以接見焉公感惶祇迎于路左 上駐蹕命公進前令子孫扶將教曰今年卽卿立朝七十年乎事甚稀貴心切欣喜當有示意之舉仍特陞公長孫範朝嘉善階公以格外恩數請還收 上曰勿過辭且教曰待日候溫和一登講

筵是所望也壬申正月 上教曰領府事今年恰滿九耄矣國朝大官之享此齡不過爲三數人則誠稀有也上瑞也內外孫中初仕調用衣資食物年例外加數輸送遣史官存問以來 上詣儲慶宮又遣史官問起居是年 太祖大王開國八回甲也追上尊號時以公差玉冊文製述官公以癯病辭不獲遂製進領豹皮恩賜秋 上陪奉 慶基殿影幘駕過公所居里止輦遣史官又問公起居差 大殿上號玉冊文製述官又以癯病辭批不許癸酉元朝 上教曰領府事今年爲九旬有一而大官此齡國朝以來

初有之盛也齒爵俱尊吉祥益臻同我太平且康且寧奚但私門之慶抑亦明時之瑞也仍令度支宴需從厚輸送設宴日遣承旨宣醞賜梨園樂先遣史官存問初三日曉以痰候微愆朝陳劄辭玉冊文製述官上許之亟遣御醫看病是日申時考終于正寢壽九十一訃聞上震悼輟朝敕曰領府事已酉奉迎大臣也貞亮之姿儉約之規濟之以文學才猷立朝七十有餘年齒爵之尊福祿之厚朝野之所共欽誦也傷盡不已命賜東園副器成服日遣承旨致祭祿俸限三年輸送易名之典待謚坐議定法當禮葬而以公遺意不敢受特命至四而竟辭之上令度支從優致贈三月葬于始興珠峰下甲坐原與夫人合封也甲戌冬上特命不待狀議謚太常議謚曰文忠謚法勤學好問曰文事君盡節曰忠嗚呼公稟真元中正之氣五行無所叅差七情無所偏倚和不流方而不隅明達而不苛矯剛確而不凝滯有文有質有體有用卷之則溫恭謙約放之則敦厚博大盖守之篤而行之誠有以擴充夫天分之所具也事親有深愛晨昏左右志物兼至家常事雖微瑣無敢專壯且貴亦常侍寢必躬掃灑日事親豈可使人爲

乎若值承宣供仕時則每曉起暗室巾洗而出戒僮
隸無譁雖傍人或未之覺也至列卿未有私所賓至
則於戶外迎話議政公性峻嚴少許可而嘗指公謂
人曰是孝子也六年居憂衰經不去身奠哭之節未
嘗一日或懈其就養于完營也泫然下淚曰吾不能
以此養吾親而今吾乃有此耶仍道昔年不赴是藩
時事愴慟不自己每晨謁廟手掃堂軒官事小暇則
輒退居丙舍日展墓悽愴怵惕行徊者久之嘗占其
右岡而謂諸子曰我欲葬焉生而有餘恨矣沒而歸
侍情所安也汝曹其識之遇喪餘慟號如初哀動左

右至九菴猶然人皆稱終身慕父母者見於公也奉
先必虔祭之如在非甚疾病則雖遠廟皆親將焉瘞
老後家人憫之而不敢諫或有以禮經及先賢老而
傳之說諷之公曰只言筋力而已何必禮經之爲引
也且今人百行不敢希先賢獨於此而稱先賢已行
者乎屢代表碣之未遑者竭誠力以盡樹之以至外
氏家祀事亦必助籩豆之實寔體太夫人平日孝心
也友于季氏判書公甚篤判書公回香且五六載公
撫愛如孩提凡服食器用必與共之比屋開徑日以
幾度見而見輒怡怡如也且與從氏諸公湛翁有一

美味不集不食諸公於公皆弟也而其最少猶七耄也皓眉偉冠昕夕對床論文史以及居官治家之法宛然有公綽家風兩妹氏俱甚窶一飽一煖惟公是資有子焉爲之娶有女焉爲之嫁視之無間已出皆爲之成立焉於族戚貧窮者周洽恩意葭莩疎屬亦莫不歸之如家苟有婚葬之不能辦者量力稱物以資助未嘗有厭苦色常置錢數百緡以待不時之求每誦范文正所云自祖宗積德始發於吾吾何以獨享富貴之語仍稱義庄之爲可法而力不能贍焉乃構一樓名曰花樹蓋取韋家故事也春秋選暇日會

族黨以惇敘之歲爲常焉公於少時夏月治舉業偶一晝寢仍自警曰此非安肆日偷者乎晝不臥則當晝不寢矣自是終日端坐亦不倚跛七八十年如一日望之儼然卽之溫然符彩燁敷襟靈昭曠接人無窮達疎昵坦懷樂易不設畦町門生下吏至乎鄉父老之蚩貿者皆致款曲待之一以悃幅聞人善則樂道之其過差則恕而容之急人之急急於水火苟力可施不憚盡心雖倉卒之際未嘗疾言遽色婢僕下流亦未嘗罵之以死童稚聚鬧于前而不之問焉存心愛物及於昆虫肖翹如鷄狗之畜聞其聲不食其

肉咸近自然不假於外家素貧性又清儉既貴顯被服如寒士至或緼袍無表而畧不經心子弟不敢以美服見所居室甚湫隘家人請葺而增之公曰苟完矣安用改爲凡瑰麗珍異玩好之具一切屏之泊然無所嗜矚然無所滓凝塵滿座案有數種書而已然亦不枯淡以爲清麤陋以爲儉有所矯情而干名也一朝服三十年渝弊甚甲辰公以正使相舟梁禮雲石趙相公寅永製朝服贈之曰非爲華也重其儀也聞者傳之爲美事時或有饋獻者立散殆盡無使有贏餘二符四節垂橐而歸至位三旌而家人產業日益匱或請置田宅爲子孫計公笑曰我有是心則豈必至今日乃爾耶吾以盈滿爲憂而爾輩乃憂貧耶公有一副素執每公退或有問禁中事輒不答常戒諸子曰謹慎是吾家世守規也汝曹切無敢論朝政臧否人物也營與邑就養時又戒之曰爲官有五畏畏天也畏君也畏神明也畏祖先也畏民也又曰居官而所當戒者債甚於貪貪與債俱害於民而貪之害明而近債之害陰而遠勿以官物養吾體必以不負官債養吾志也公之平生所爲固無不可對人言者而其爲臣盡臣之精忠純忱足以質神明而貫

金石自弱冠影纓之初矢于心曰事君以勿欺爲主且不擇夷病不較劇易惟上所使鞠瘁而後已遂直道向前靖共有位已於簪筆時毅然有不可犯之色旣入玉署先以格君心進聖學爲本而凡係朝政得失國計利害民生休戚懇惻剴切遇事盡言言人所不敢言受知純廟眷顧隆赫寵獎而擢拔之蓋公祿位事功名節之盛皆於此乎根柢矣際翼憲兩朝立殿陛爭是非坐廟堂相可否諫官與宰相之責公實兩盡之有忤聖旨屢承匪怒而日月在上照公丹衷謂公忠直無他恩遇終始無替當己酉危疑

之會特屬公奉璽迎哲宗乃於初元卽起公舉國而聽此非所謂托六尺而寄百里者耶其倚重有如此逮夫今上臨宸又授相印公已老且癯矣每公之子若孫入對輒詢公起居狀至教曰勲業克繼文翼翼憲兩公而兼享潞公之壽汾陽之福矣所被隆注於朝廷無二焉公屢贊辯章蹇蹇匪躬謀體斷論知無不爲凡所建白而獻可者非切急務則皆長遠慮澤利所及丕冒遐陬若夫典選部而鑑衡平允掌試事而關節屏息者在公弘猷閎業特一二疏節耳尤何有乎治郡治藩之績乎然公當百弊千瘼之所

器窳處左圓右方口應手判頃刻籌畫鑿鑿中窳而
至於按一獄則夜燭丹筆欲下還止屢起彷徨而不
能決凡如是審閱疏釋者甚衆聚錄其文牒爲五冊
名曰惟輕錄公之平日用心可見於此也申太史在
植語公曰吾於史局見 純廟紀事靜攝中惓惓陳
勉者惟君一人吾特書諸策令後世知有忠告之臣
或有問公以方榮塗進取時有躁競之心否乎公曰
吾自叅外得一官則輒自謂分斯足矣隨遇而安不
敢有更進計則躁競何自而生乎且吾恒所自勉者
是不忮不求四字也蓋公之修養不但在節攝也不

以寵辱得喪捷其內神全而旺氣泰而舒者蓋如盛
壯時正所謂醅醉事物少年不能及也王子引年再
疏具草不果上傍人請其故公笑曰吾豈有鍾漏餘
戀哉夫求退者當進而退也今吾位上相矣當有何
復進而必求退耶且求退是仕宦之極致也美名也
吾甚懼崇亢姑欠此一節留一分餘地可也自少嗜
書及貴亦每冬讀訖一經於西藩按事時則讀大學
以續年課平居閒坐未嘗不看書至大耄不廢味之
如芻豢蓋素性然也旁蒐博涉地負海涵爲文章立
就千言閎中肆外專尚紆裕其視峭厲鏡畫以爲工

者不啻懸也章奏條達瞻暢道得人所未道尤長於
館閣文朝廷大冊之用公者前後爲二十有餘以至
士夫家鍾鼎碑板之銘多出公手人誦其名家誦其
書有韻則澹宕有閒雅趣其古體高邁蕩漣奇變不
窮又好觀故事凡儀文制度進退損益瞭然如指掌
於書藝不致力而雖機務旁午之中四方書疏無不
手答字畫必端嚴整服若無事時先儒有曰韓魏公
書蹟雖與親戚卑幼亦皆端嚴是其胸中雍容和豫
故無頃刻忙時亦無纖芥忙意此正爲公道也公始
釋褐桐漁李相公相璜謂公曰君廊廟器也須自護

在堂后時領相徐公龍輔一見公洒然異之曰內蘊
而外彪遠大器也我願交焉楓臯金太史祖淳聞翰
院有讀書聲問之乃公也心甚欽之及於內閣一見
卽忘年嘗語曰他日必當大事須多讀書且曰君之
文必傳後吾願因君而獲傳名焉有爲文贊公曰水
則有龍山則有鳳惟經山子超脫塵鞅如李屐翁晚
秀徐竹石榮輔南思穎公轍沈斗室象奎與金楓臯
世稱五太史也皆折輩行而友之徵逐唱酬因以身
後文字托焉老成長德之期詡而傾嚮之者蓋如是
矣嗚呼公歷事 五朝策名爲七十二年在兩府且

三十三年八入中書元輔者六而嘉禮正使者再奉
迎于 哲宗沁邨爲賓于 當宁冠禮而回登回榜
邵籌望百特授几杖三宣宣醞賜樂之命其盛矣哉
天降大任身繫安危柱石於國家冠冕於士林施博
利則喬嶽巨浸稽大疑則靈著文龜上而 聖主詔
其忠入則鄉黨襲其和出則朝廷仗其重遠而窮滲
絕峽耘夫織婦莫不繪其像而頌其惠誠孟子所謂
名世者又朱子所謂材全德備不見成名之迹者也
而世稱公大節之特著者三曰史筆直實之記也曰
藥院爭執之啓也曰言臣寬恕之請也有尙論者曰

儘卓然矣又凜然矣然已丑薇垣第二封事亦公之
一大節而世未能詳也是固知公者深矣惟其一語
默一猷爲之際憂國愛民之念惓惓無一刻忘于中
傷人害物之事斷斷無一毫存諸心此又公得之本
然之性平生所受用而不盡者也嗚呼如公者此世
安得復見也若公之大畧似宋朝人物氣象之於明
道心事之於希文勲德之於君實面折廷爭則於寇
萊公文章風流則於歐陽子爲近之其壽祿榮名之
全而兼之者惟皇明有王端毅可方之焉此非一人
之私言也一國之言也將書之縑素書之旂常屢書

而不勝書所著有遺稿四十卷黃閣章奏二十一卷
袖香編三卷文獻撮錄五卷北征錄十卷藏于家配
貞敬夫人江陵金氏禮曹判書文靖公啓洛女卽吏
曹判書翼獻公之孫也生與公同年先公十六年丁
巳卒壽七十五端貞淑溫動合壺則幼時翼獻公嘗
竒之曰女士而吉相也宜爲賢人婦有昌祿以裕後
及于歸以順以慈婦母母諸子榮顯喜且戒曰喜
常情也盈盛得無懼乎 純元聖后見戚臣頻問安
否及卒歎曰甚愴廓舉三男一女長基世前贊成仲
基季蔭正季基命府使女適尹周鎮蔭承旨基世子
範朝今判書景朝蔭正郎女適李翊宰進士趙肅夏
文承旨基季子默朝進士信朝闇朝今應教庶子彬
朝基命系子宅朝庶子賢朝武科前僉正謹朝女適
趙秉攢金炳鎬周鎮子滋福主簿滋憲今判書滋祿
蔭牧使範朝子寅昇今說書餘并幼滋憲於平昔厚
被我外王考眷愛日夕奉警咳今焉想像音容如隔
前晨猥欲自效狀德之文文拙而德巨萬萬不能髣
髴矣然寧損於實而不敢溢於辭者恐違公冲謙之
志也謹撮梗槩撰次如右以俟世之尚德君子有所
考信焉

外孫崇祿大夫判敦寧府事兼判義禁府事知
經筵春秋館事同知成均館事弘文館提學
世子左賓客 奎章閣提學督辦軍國事務坡
平尹滋真謹撰

經山集附錄卷二

經山集附錄卷三目錄

墓表

墓誌

教書

內賜 御製 御筆二附

不允批答_二

賜祭文_四

經山集附錄卷三

墓表

府君姓鄭諱元容字善之號經山我鄭系東萊自麗
朝始顯有諱穆官左僕射入本朝有諱蘭宗吏曹判
書東萊君諡翼惠生諱光弼領議政諡文翼配享
中宗廟庭號守夫爲士林領袖生諱福謙府使生諱
惟吉左議政號林塘生諱昌衍左議政號水竹生諱
廣成判書號濟谷生諱太和領議政諡翼憲配享
顯宗廟庭號陽坡生諱載岳蔭知敦寧寔府君五世
祖也高祖諱任先進士曾祖諱錫曾贈吏曹判書祖

諱啓淳大司諫贈左贊成考諱東晚敦寧府都正贈
領議政孝友謙儉克世其德妣贈貞敬夫人龍仁李
氏禮曹判書孝簡公諱崇祐女也淑哲有聞範三世
贈誥用府君貴也府君以 正宗癸卯二月十八日
生 純祖壬戌擢庭試甲戌陞通政己卯嘉善庚寅
資憲 憲宗丙申正憲丁酉崇政辛丑進拜右議政
壬寅陞左戊申領相至 當宁戊辰八入中書六爲
元輔而其歷官也於翰院檢閱奉教於內閣直閣直
提學提學玉署則修撰校理應教兩司則經諸職至
大諫大憲政院則自同副至都承旨諸曹則戶參工
判吏禮兵刑曹參議判書而於吏兵則亦經參判國
子則大司成同成均冑筵則弼善輔德賓客間爲文
兼東學教授軍資司僕正經筵春秋弘文藝文兩館
提學摠府京兆尹判義禁中樞判事領事於外則寧
邊會寧二府湖南關東西北四藩及華營居留而湖
南辭不赴使命則京試官問禮官湖西關西慰諭使
年貢正使館伴使 憲 哲兩朝嘉禮正使提舉則
籌司槐院司譯宗簿造紙內醫內贍若 太廟 太
社 南殿 闕宮藥院奉常司饗軍資軍器訓御兩
營三軍府并都提調而又兼縮扈衛大將製迷官則

玉冊謚冊教命樂章誌文上樑文前後凡二十餘也
奉迎于 哲宗沁都任之專也爲賓于 當宁冠禮
簡之隆也引年請休則勉之以手批歸鄉不起則迫
之以躬迎倚毗之重也壬戌以登科回榜賜几杖辛
未以立朝七十年特旨陞長孫範朝嘉善階壬申以
年躋九旬又特旨授外孫尹滋祿初仕癸酉元朝以
大官望百之齡爲國朝初有命宣法醞御樂自丁巳
回卷時至是年三承是命是皆優老之異數也因掌
令李魯確疏引義自靖譴罷者一南陽投畀者一北
藩補外者一至大拜旋罷者一因正郎柳宜貞疏抗

論忤旨特罷者一因曹西洲文集事事端層激施以
不敘之典者一此則槩可見府君夷險之節也嗚呼
府君資性和粹而秉執剛確已自簪筆初毅然無所
撓受知 純廟眷顧隆赫歷事 五聖一以直道名
德俱著恩遇無替蓋策名七十二年在兩府者三十
三年矣其言議事功經術文章之顯白當世者太史
氏必書之縑素以垂于無窮後之欲考信者於此乎
可徵若夫居家懿行鄉黨咸誦之小子亦何敢私述
焉癸酉正月初三日考終于正寢壽九十一訃聞
上震悼輟朝下隱教致侑賜東園副器三月葬于始

興珠峰下甲坐原與夫人合封甲戌特命議諡諡曰
文忠配貞敬夫人江陵金氏禮曹判書文靖公諱啓
洛女吏曹判書翼獻公諱華鎮孫也癸卯四月十一
日生丁巳三月十九日卒壽七十五端貞溫淑動合
閨則幼時翼獻公奇愛之曰女士而吉相也宜爲賢
人婦有昌祿以裕後是言果驗嗚呼我先君嘗敘次
事行爲誌文銘于石百世可以不朽也三男一女長
基世今贊成仲基季蔭正季基命府使女適尹周鎮
蔭承旨基世子範朝今叅判景朝今洗馬女適李翊
宰進士趙肅夏今承旨基季子默朝進士信朝閔朝

今進士庶子彬朝基命庶子賢朝武科前僉正謹朝
女適趙秉攢今武科周鎮子滋福主簿滋惠今判書
滋祿今縣監範朝子寅昇餘并幼男基世謹誌

墓誌

府君姓鄭諱元容字善之號經山系東萊入本朝有
諱蘭宗吏曹判書東萊君諡翼惠生諱光弼領議政
諡文翼配享 中宗廟庭生諱福謙府使生諱惟吉
左議政生諱昌衍左議政生諱廣成判書生諱太和
領議政諡翼憲配享 顯宗廟庭生諱載岳蔭知敦
寧生諱任先進士生諱錫曾贈吏曹判書生諱啓淳

大司諫贈左贊成生諱東晚敦寧府都正贈領議政
寔府君考也妣贈貞敬夫人龍仁李氏禮曹判書諡
孝簡諱崇祐女也三世贈誥用府君貴也府君以
正宗癸卯二月十八日生自幼聰明甫成童博通經
史 純祖壬戌擢庭試甲子隸槐院乙丑薦注書始
以假注書入侍 上注視心器之詢年紀世閥宣饌
以寵之府君受 上知自此始丙寅叅賓對時領相
徐邁修以右相金達淳所奏稱爲忠愛旣而宰臣臺
臣討右相甚嚴領相從子有恂在翰院乞改記注一
字府君拒之世皆憚剛直府君每攝史召對 上欲

其近前令翰注分左右後遂爲例丁卯拜藝文館檢
閱戊辰陞奉教旋陞六品兼文臣宣傳官己巳拜弘
文館副修撰登講筵奏曰 殿下天姿卓越若自恃
聰明自多自聖則君德日孤矣除平安道京試官兼
東學教授庚午拜副校理 上試武藝于後苑府君
在直立草疏數千言畧曰試射較藝一將臣職耳又
曰諸道百萬飢民嗷嗷願領而朝著之上則恬然晏
然殆無猷爲民安得無怨 上獎之曰真鐵中錚錚
之言也拜司諫院獻納辟訓局從事官辛未拜司憲
府持平掌令副應教差問事郎廳壬申拜軍資監正

移應教尋拜侍講院弼善差問禮官還拜書狀官不
赴癸酉拜司諫辟兵曹正郎拜 奎章閣直閣司僕
寺正甲戌拜執義以 正宗御製校刊勞進通政階
拜右副承旨移兵曹叅知之亥以檢校閣臣登診筵
奏賑政甚剴切至曰民背天怒而國不亡者未之有
也陞左副承旨拜輔德丁丑拜兼輔德戊寅拜禮曹
叅議移左承旨凡一職屢除者不能悉記而前後拜
承旨爲五十有餘已卯拜吏曹叅議轉成均館大司
成歷兵曹刑曹叅議移大司諫有一臺疏潛售挾雜
諸臺請罪之不從府君疏請從諸臺之請且論臺啓
措辭不審請并罷之批曰爾言明白可以曉人秋湖
西有水警命爲慰諭使躬審面諭宣上德意歸陳事
宜悉施行之民不知災 王世子行嘉禮以禮房承
旨進秩嘉善兼同知義禁府春秋館事都摠府副摠
管拜漢城府右尹出爲寧邊府使未辭陞通擬副提
學甫下車事有病於民者靡不殫精釐抹闔境大治
辛巳平壤沴氣大行又命爲慰諭使卽疏陳西路濫
稅虛糴諸弊矯革之方及振鄉綱收人才諸條以聞
上採用之旣歸民磨崖繪像而思焉凡府君分符按
節及公私行所過輒有遺愛至居旬軸澤利民尤博

以碑以祠遍於八路壬午以左承旨召還陞都承旨
是歲丁議政公憂甲申遭內艱丙戌服闋拜左尹轉
兵曹叅判丁亥差備邊司提調拜全羅道觀察使疏
陳不洎之慟三辭不赴拜同中樞復拜大諫時翼
宗以世子代理因賓對以敬天愛民陳達拜江原道
觀察使捐廩拯弊慮囚伸枉條列巨瘼而論啓之戊
子入拜吏曹叅判弘文館提學戶曹叅判左副賓客
司譯院提調己丑拜奎章閣直提學復除諫長先
是都憲朴公綺壽論進饌女伶事被竄府君上書請
宥有一時宰訪府君言睿意眷注公甚隆將朝夕柄
用以諷之府君不顧也時朴公已宥而辭教猶過中
復上書有曰邸下蓄怒於旣原之餘吝過於將改
之際辭極激切時論黷之會北關告水災擇宰臣界
邑會寧府使缺銓曹四改擬竟授府君愍窮卹患峙
穀一千六百石名曰民倉以備灾荒民至今賴之庚
寅以廟奏擢資憲入拜知經筵大司憲差關東勾管
堂上辛卯差王世孫冊封勅館伴使拜刑曹判書
都總管奎章閣提學知中樞府春秋館以冬至正
使赴燕壬辰還拜工曹判書兼宗簿寺提調同成均
癸巳拜水原府留守蠲俸賑饑民無捐瘠尋移平安

道觀察使首釐餉弊備米二萬四千斛以充之減軍
錢添城穀置學田贍吏餼防戶歛皆取給於廩以萬
計臨歸又儲羨餘銀五千金於慈城以實邊圉乙未
圈文衝准點再疏遞還差有司堂上知實錄事纂修
堂上時 憲宗冲年御極府君以閣臣日侍講筵裨
益弘多提調造紙署勾管關北丙申拜兵曹判書藝
文館提學知義禁以 純祖 翼宗御製印進勞陞
正憲兼內醫院提調差實錄校正堂上製進 東朝
樂章文丁酉祔 廟尊崇禮成以敦匠勞進崇政階
拜判義禁禮曹判書戊戌拜吏曹判書議薦經學人

成近默李敏行洪直弼李亮淵已亥以尹敬圭擬齋
郎事洋儒捲堂有侵逼語府君疏引蒙遞掌令李魯
確疏詆尤悖批以朝廷倚毗嚮用之人論斷太過責
之遞其臺職府君屏居鄉廬荐拜弘提禮判命上來
又命金吾問備令政院問啓不肅而退嚴教譴罷之
旋降除旨又不膺命投畀南陽旋宥拜判義禁判尹
大王大妃殿垂簾下教曰近開講筵宜卽上來因縣
道陳疏隆批開釋仍飭問啓又不肅 慈教曰素執
采堅無可致之道任行其志而已仍遞職尋拜藥院
提調以湯劑事下飭教乃赴院兼內贍寺提調庚子

拜咸鏡道觀察使又連章引義批曰卿之引義迄可
休矣猶有未盡禮使之道乎仍問去就於政院對以
無變動嚴教施以補外府君惶悚赴任歲大荒捐俸
爲粥與饑者又備穀六千石悉挾營府諸僉民以蘇
息行養老宴及鄉約鄉飲之禮自寧邊所至輒行之
蓋敦風教也辛丑內移差湖南勾管堂上四月枚卜
拜議政府右議政諭曰卿端亮之姿明達之識清儉
之操謙約之行可以上贊君德下匡世道民與國有
賴也府君間雖怵迫嚴命再膺內外而每以自靖永
矢自承是命益復惶慙屏江郊屢疏悉暴情勢曰今

臣去就雖雷霆在上鈇鉞隨後蠢動無路有死而已
批有予小子無足與有爲之教府君胥罪于始興縣
獄命罷職未幾復授又疏申懇批畧曰古名臣碩德
被僇辱而復出者曷嘗如卿今日爲又諭曰予何惜
非常之舉不爲感回之道乎府君驚惶進胥金吾
上收其句語而諭旨彌隆不獲已遂出肅 上諭以
引義太過府君面陳血懇退復申籲 上優批勉之
拜司饗院內醫院都提調登賓筵首以勤學愛民容
諫恤獄陳勉 上并嘉納壬寅拜 景慕宮御營廳
都提調陞左議政夏旱甚陳勉修德正事之實 上

爲之改容又奏雖齋日亦議讞無俾滯囚癸卯奏獨
身編配親年七十則宜令宥還 上賜可是歲以府
君回甲 上遣掖隸詢近狀賜蓼茸屢乞解遞付判
中樞府事製進 孝顯王后謚冊文甲辰陞領中樞
差 王妃嘉禮正使製進教命文乙巳就養于長子
成川府任所丙午還奏關西切急民事三條悉蒙允
綏陵遷奉時 上動駕府君以藥院都相陪扈值大
雷電以雨平陸成江府君以單騎馳入轎前問候仍
衛內從邁聞者稱得大臣體製進 綏陵遷奉表石
陰記故事非隆冬盛暑則 中宮殿藥院問安只以

口傳而無啓辭大臣登筵亦無問候 純廟辛巳以
後一依 大殿問候至是下教曰 中宮殿問候依
古例釐正府君時在藥院日行之久矣何敢遽改遂
再啓爭之又與僚相再劄 上不從命入侍 上教
屢勤而爭執不已 上手持問安啓辭舉筆欲釐正
府君高聲奏 殿下不當如此牽裾而止之者三仍
曰臣大臣也所言且是 殿下豈可不開納乎請亟
下啓辭之批 上曰筵退當下批矣及退承批只答
兩慈殿問候又啓劄屢爭之游承嚴教翌年元朝賀
禮府君陞殿問候奏曰元朝也慶辰也宜有 坤殿

問候仍問 中宮殿氣候 上曰古例乎對曰是古
例也丁未差 正宗 純祖 翼宗三朝寶鑑校正
大臣戊申差上號都監都提調製進 純祖玉冊文
拜領議政至諭曰人亦有言必曰世好歷數朝廷豈
有予與卿之世好乎府君感恩膺命以勤講學重民
牧等六條及痛禁魚鹽堰泆之宮房所侵徵者反覆
陳奏平壤府糶糶多欠折奏請更張 上問糶數幾
何對曰八萬七千餘石矣 上曰民弊至此特蕩之
上於筵中出示吏郎柳宜貞疏勉聖學崇節儉及請
宥金興根也 上曰此疏覬覦朝廷嘗試君父寧有

如許臣分乎府君曰向令朝野咸言得失今若罪之
包容之德所損大矣 上曰只陳勉則語雖荒雜豈
不包容乎府君曰善則用之不善則置之亦何足傷
古語曰詢于芻蕘芻蕘之說豈盡善而然乎臣何可
徒順 上旨不敢言所當言乎 上曰卿於此謂無
傷國何以爲國乎府君曰求言而有此嚴教則言路
杜塞然則亦國何以爲國乎時天威震疊殿上皆股
慄府君退胥金吾命罷職冬敘付判中樞已酉 東
朝寶甲載回 上特諭以慶辰獻賀之意府君陳章
請罪承溫批赴賀班六月 憲宗昇遐 東朝垂簾

定策命府君奉迎 哲宗于沁都府君奏曰此事至
重精書定策之教印御寶奉綵輿以進可矣陪衛儀
文不以倉卒有闕遺越二日奉迎還卽日 上卽降
府君簾前奏今日急務無過典學惟 慈聖教誨勉
戒導成君德又請慎擇近習時議 憲宗祝式引唐
宣宗稱嗣皇帝之禮獻議復拜領議政 上諭及
慈教繼降有曰國勢板蕩人心危疑此時此任捨卿
伊誰再疏懇辭批有未安句語旋命收還 慈教又
惻怛不敢固辭登對奏曰 殿下春秋鼎盛學問無
異冲歲此誠汲汲時也因以 純祖敬天奉先勤學

愛民節儉納諫諸條勉以監法又奏令刑曹課日會
坐審冤獄外道亦究覈登聞并蒙採納每侍講細繹
文義以開晰之 上輒曰曉然矣製進 景陵表石
陰記庚戌再疏引病承批難安進城外 上爲之收
還命行賓對又三疏不許仍促行對力疾趨造特授
扈衛大將差實錄摠裁官 上於經筵賜御書天保
章八幅時中國有喪迎勅者再專使者七冠盖相續
三路多事指顧取辦常裕如也湖南關北京畿諸道
糶糴之虧欠者累鉅萬次第論奏戢奸恤隱懲創而
蠲蕩之且以糶法之最厲民者如關西之添餉海西

之加作湖南之移貿并條陳禁斷尋以位次爲左議
政又疏懇始解辛亥以 真宗祧遷當否詢議議曰
帝王家以統序爲代 今上 憲宗之嗣王也 憲
宗祔廟 真宗以五世當祧禮之常也若以親序而
言則以月祭之親行夾藏之制情有所未安請博攷
典禮然後議行差 祔廟尊崇都監都提調訓練都
提調製進 徽定殿玉冊文差 王妃嘉禮正使王
子入耆社 上親摠萬機行朝叅府君奏請依皇明
日講令講官每朝詣閣入時刻平坐對卷簡其禮數
嚴其規程 上翕受仍命議定日講之規上引年疏

上手批以勉之製進文苑黼黻續編跋摛文院御製
詩後記 上親書下經山老人四大字以寵之癸丑
就養于長子沁都留營 上以沁爲潛御之鄉設儒
武應製命府君試取還奏請惠廳劃送蓄儲于沁以
爲遠圖蕩各庫舊債之爲民弊者并從之製進 翼
宗追上號玉冊文因廟議被配人率眷可否引皇律
請許之冬叅日講 上賜御書楹帖一對甲寅自長
子完營任所就養還建白湖南民事全州之軍布長
城之漕穀稅米之欠縮島民之失業順天之疲於七
衙加里之困於屬鎮諸弊并釐抹之民情大悅乙卯

製進 景慕宮追上號玉冊文 上將幸 仁陵議
遷奉也命諸大臣并進府君適患痢陳病劄承批賜
諒因曹西洲文集事是日有吳懋悖疏舉一邊盡難
安將陪扈者皆引出旋承飭旨赴班回鑾後嚴教並
刊削府君以陳劄之亦在伊日上章乞同勘批曰大
臣陳病誰爲不信前臺任憲大疏論刊削諸人語逼
府君府君屏鄉廬宣諭至四有未安句語胥命金吾
上反汗而開釋之府君還私次仍詣 綏陵時 綏
陵亦將遷奉也製進 綏陵遷奉誌文陳疏尋鄉承
溫批臺官朴在皞疏申前事 上教曰事端層激不

可無調停仍施不敘丙辰特敘付領中樞抗疏自引
批諭至四五以 東朝患候平復將與大臣耆耆宣
饌飾喜敦勉不敢辭遂赴朝拜藥院都相蓋勉留之
也製進 仁陵遷奉表石陰記丁巳 上教曰聞領
府事回卷在邇令梨園送二等樂度支送宴需與內
外衣資食物當日遣承旨宣醞特遣別兼春秋金炳
弼存問 內殿又賜紬緞并及於貞敬夫人翌日進
謝箋 上便殿親受令子孫隨入面諭甚摯且親書
以教之曰卿位登台司年踰七耄而琴瑟在御醮期
載至三子俱以官俸供歡觴豆卿家福祿世所罕比

真國之嘉瑞也予亦望卿之壽而希卿之福矣府君以祈祝陳勉之語縷縷敷奏上曰卿有言輒懇切無非向予至誠予心悅然開發矣命宣饌賜銀瓶銀盃盞異數也獻純廟稱祖議製進純元王后追上號玉冊文哀冊文差三都監摠護使戊午兼宗廟署都提調元子誕生以藥院都相勞賜鞍馬豹皮奴婢田結授任子之典自宗伯至中書廐駟文豹之寵賚爲數十遭已未重卜領相屢諭始出膺奏堤堰濫稅曰內司寧失千頃田四境不可有一夫冤又奏官職特除非美事而外道監牧各營各司校吏有

因下教爲之云閭里微賤之姓名何由上達乎又奏令銓曹議廟堂薦已試有績者十人直差守令以責成效尋乞解不獲奏革晉州結斂劃補畿邑儲置立嚴規以塞弊源獻憲宗定世室議庚申特授季子洪川縣監府君奏曰臣子特授想出惠養之眷而臣子愚魯不勝憂悚因此而有仰奏者近來殿下所特除者何以俯燭其才能乎不過爲其人施恩不念民事矣自今一付銓曹俾慎擇焉上稱善又請守令與道伯親避當遞而有治績者宜以他道換從之章六上獲遞就養于洪川任所還奏本縣還逋之急

者請弛之 上候微愆旋復府君在藥院請診乃戒于 上曰色荒甘酒未或不亡今國勢孤危災異荐臻此豈 殿下逸豫耽樂之時乎兼 永禧殿軍器寺都提調辛酉復授元輔屢疏不許至有予何惜非常之舉之教惶懼遂承膺未幾以病力辭乃免兼社稷署奉常寺軍資監都提調壬戌 上教曰領府事今年恰滿八耋唱名之星紀一週矣齒德俱邵福祿並臻歷事 四朝旣康且寧此邦家之瑞也仍命回榜日几杖當親授帽袍華盖令該司舉行衣資宴需令度支從厚輸送賜一等樂宣醞特命左承旨尹滋

真宣諭府君劄辭批曰尊年盛典已有 列朝故事况卿祖先再領是賜乎又劄請收親授之命批賜勉從時 上候有慎也放榜日命子孫中儒生童蒙皆隨入及進謝箋 上親受之諭曰卿向國斷斷之誠爲民懇懇之心予所倚毗朝野所欽歎則諸福之集卽天所佑善也几杖宣賜適因靜攝未克親授尙覺悵然御製詩親書以下府君先陳獻年壽國之祝仍勉保攝聖躬 上答以書紳服膺時三南繹騷迫逐長吏朝廷設釐整廳議採三政之弊以諸大臣摠裁之左相趙公斗淳請罷還穀田每結斂錢二緡以代

收耗府君奏曰還不可罷結不可歛 上命府君劃
定節目乃撰釐整節目具劄以進府君在鄉廬復拜
領相敦召之恩禮曠絕輒引病請罪 上遽下躬迎
之教衛儀已備府君震迫靡措急詣金吾胥罪 上
爲收成命諭以臨軒俟之卽日出肅退而復辭不許
以節攝勤學陳戒又書進一本以資省覽府君建議
還結兩政復舊規并軍政釐掾之又以逋簿爲民瘼
之源遂奏蠲諸道還逋摠幾萬石恩歸于上惠究于
下民乃大悅騷訛并息咸興濟州之亂民脅從者並
論奏全活之癸亥筵奏李文敬公世弼純學正道請

不祧從之府君於崇賢彰義之政尤用心焉如牛溪
栗谷二先正祀孫守令特除李公恒金公義貞柳公
沃朴公胤源及顯忠祠八義士賜諡贈官皆前後所
建請也以宗系辨謬請上尊號引 宣廟已行之禮
也製進 中宮殿樂章文差 徽慶園遷園都監都
提調每筵乞釋務退輒以疏乃勉從 哲宗昇遐
東朝命府君爲院相今 上初封翼成君行冠禮命
府君爲賓 上御極首以敬天法祖勤學等八條疊
疊陳勉并嘉納甲子製進 東朝樂章文差實錄摠
裁官乙丑製進康寧殿上樑文丙寅製進 東朝上

號玉冊文 上親摠萬幾行朝叅府君以周召之誥
成王曰誠小民曰知小人依拳拳陳戒製進 坤殿
冊妃玉冊文 哲宗追上號玉冊文丁卯製進 東
朝上號玉冊文戊辰 御書下老經山三字復拜領
議政遂登對懇辭仍呈告至四繼又陳疏力辭 上
深察其不可強始許付領中樞己巳製進 東朝上
號玉冊文差三軍府都提調辛未 上展拜 儲慶
宮先遣史官問近狀府君祇迎于路左 上駐蹕命
進前令子孫扶之教曰今年卽卿立朝七十年事甚
稀貴心切欣喜仍特陞長孫範朝嘉善階壬申 上

教曰領府事今年恰滿九耄矣國朝大官享此齡不
過三數人誠稀有之上瑞也內外孫中初仕調用衣
資食物加數輸送以 太祖開國八回甲追上號差
玉冊文製述官辭不獲遂製進又差 大殿上號玉
冊文製述官癸酉元朝 上教曰領府事今年九旬
有一大官此齡國朝初有之盛也令度支輸送宴需
設宴日遣承旨宣醞賜樂先遣史官存問初三日曉
以痰候微愆朝劄辭製述官 上許之亟遣御醫看
病是日申時考終于正寢訃聞 上震悼輟朝教曰
領府事己酉奉迎大臣也貞亮之姿儉約之規濟之

以文學才猷立朝七十有餘年齒爵之尊福祿之厚朝野所共欽誦也逝單遽徹傷盡不已命賜東園副器成服日遣承旨致祭祿俸限三年輸送易名之典待謚坐議定法當禮葬而以遺意不敢受 上命從優致贈以三月葬于始興縣珠峰下甲坐原與夫人合封也甲戌冬 上特命不待狀議謚謚曰文忠謚法勤學好問曰文事君盡節曰忠嗚呼府君自弱冠釋褐之初卽以事君勿欺鞠躬盡瘁爲心直道以前毅然有不可奪者旣入玉署先以格君心進聖學爲已任而朝廷得失生民休戚皆言人所不能言若夫

銓選則公掌試則明在府君事功特疏節也尤何有乎郡藩之績乎每按一獄則夜燭丹筆欲下還止審閱疏釋詳當平允聚錄其文爲五冊名曰惟輕錄府君之平日用心於此可見也遭遇 純廟眷注之盛當世罕比逮 翼 憲兩朝立殿陛爭是非坐廟堂相可否諫官與宰相之責實兩盡之雖屢忤 聖旨且撓世故而忠直感於至尊望實孚於朝野恩遇無替名德以全當己酉危疑之際奉璽翼室舉國以聽今 上臨宸之初受總已之重皆古所謂托六尺而屬大事者其倚毗有如此自癘耄以後嚴君暨小子

每登前席則輒俯詢起居教曰勲業克繼文翼翼憲兼享潞公之壽汾陽之福上駕過府君所居里止輦遣官存問其禮遇之隆又如此每四方人替謁必問其土瘠瘠有無是以府君前後所奏皆切於民者也蓋府君歷事五朝策名七十二年在兩府三十三年八入中書六爲元輔此府君立朝之始終也府君事親有深愛自幼常曰爲子而爲親之所不欲則非子道也至貴亦侍寢躬灑掃家事雖微細無敢專者六年居憂衰經不離身遇喪餘號慟如初每晨謁廟手掃堂軒至九旬如一日家人以寒暑請節宣則

曰尙能拜跪矣官事少暇輒退丙舍日展墓悽愴久之世稱終身慕者於府君見之與季氏判書公比屋而居日怡怡然判書公同躋遐齡亦過回盞而撫之如孩提與從氏諸公昕夕相對有一美味不集不食聯床論文史或終夜忘寢兩妹氏甚窶常戀戀不忍捨一飽一煖靡不與共其子女視如已出皆嫁娶而成立焉族戚鄰黨之窮者必殫力以調卹常慕范仲淹義庄而力不贍乃爲樓名花樹春秋暇日聚族黨而惇敘之歲爲常焉鄉里父老之蚩蠢者語之必欵曲婢僕童穉或聚鬪于前而未嘗加以聲色鷄狗

之畜聞其聲則不食被服如寒士居室湫隘不以經
心瑰麗珍玩之物屏絕無所近自少嗜書至大耋不
廢爲文章閤中肆外專尙紆裕章奏條達瞻暢尤長
於館閣文凡撰朝廷大冊者二十有餘以至士夫家
鍾鼎碑板之識有不得府君作者皆恨之自二符四
節至兩府而家益匱或請爲子孫計則曰吾以盛滿
爲憂不以貧爲憂嘗戒子孫曰毋妄論人物謹慎以
蹈先規母外慕榮利謙約以守吾分不忮不求四字
吾恒所自勉也又曰居官有五可畏天也君也神明
也祖先也民也汝曹爲官勿以官物養吾體必以不

負官債養吾志此府君居家行誼之實也外孫內閣
提學尹滋憲狀府君之論曰府君稟真元中正之氣
五行無所叅差七情無所偏倚和而不流方而不隅
有文有質有體有用孟子所謂名世者而朱子所謂
材全德備不見成名之跡此非一人之私言也一國
之言也其殆庶幾府君之萬一乎府君所著有遺稿
四十卷黃閣章奏二十一卷北征錄十卷袖香編三
卷文獻撮錄五卷藏于家配貞敬夫人江陵金氏禮
曹判書諡文靖諱啓洛女也生與府君同年先府君
十六年丁巳卒壽七十五端貞淑溫以順以慈從貴

借老克享福祿府君嘗敘次言行爲誌藏于幽舉三
男一女長基世今贊成仲基季蔭正季基命府使女
適尹周鎮蔭承旨基世子範朝今判書景朝蔭正郎
女適李翊宰進士趙肅夏文承旨基季子默朝進士
信朝閭朝今應教庶子彬朝基命系子宅朝庶子賢
朝武科前僉正謹朝今學官準朝女適趙秉攢武科
金炳鎬周鎮子滋福主簿滋惠今判書滋祿蔭牧使
範朝子寅昇今說書滋福子相萬女適鄭圭燮李輔
榮今注書滋惠子相萬系滋福相衍相紀相鐘翊宰
系子箕承餘并幼小子逮事府君四十一年至登宰

列今已崇顯矣而荒嬉無所成立追思辟咎撫頂之
誨宛如昨日而邈乎其不可再矣嗚呼府君大節關
係國家懿德厭飫人心太史記之士林誦之愈久而
愈著小子何敢私述焉謹綴事行之梗槩納之于竊
少伸永慕之私云孫男範朝謹識

回榜日

賜几杖教書

原任奎章閣提
學金學性製進

王若曰位至大官年至大耋而尤貴乎大闡之名壽
有回甲蚤有回昏而莫尙於回榜之慶此昭代所稱
人瑞伊寵錫合施殊恩周讌國寶葦詩詠緝御之授
漢尊者德槐閣侈靈壽之頌恩則同貳膳常珍聖主

所以惠也榮實邁便與扶掖老者當使安之惟卿有
完福而爲完人以元老而兼元輔由文翼以後相承
十世保又若有商之陟咸自 純廟之初歷事 四
朝倚重爲聖宋之韓富故家喬木推大廈棟樑之材
早歲蜚英置東壁圖書之府爲模楷而自持風裁及
門者皆謂登龍處軒冕而不改寒儒治廳事僅容旋
馬若夫治世之韶護卓然餘事之文章華國之手不
羣高文溯秦漢之軌作家之體有正鉅筆追燕許之
風素蘊歷試於後前丹忱靡渝於終始遂膺 先后
簡心之寵用副衛士加額之情著茂績於三藩兩銓

國人耳目所覩記席華闕於一門十相元首股肱之
明良獻替殫誠尊君德於日月輔導竭力勉聖學於
天人卻堯夫不作皺眉生太平時老太平世范希文
自期立志後天下樂先天下憂惟其才德之兼全蔚
有勲勩之可紀頃代邸迎駕之日奠洪基於泰磐在
洽陽定祥之辰相大禮於京室必先崇經術以崇政
術眷眷於端本出治每欲順民心以順天心懇懇乎
誠小祈永猗令望是以有譽而厚祿罄無不宜人生
古稀繪綃像於靈閣君子偕老舉匏盃於重牢萬石
君之俸二千而子弟質行莫及郭令公之考廿四而

兒孫問安者多心和氣和聲和宜吉祥之自至爵一齒一德一蓋達尊之莫如迺者太歲之在壬卽卿大第之舊甲三千字獨對妙齡在馬遷游淮六十歲一周遐筭同太公釣渭科名不偶猗我純元后舟梁慶年邦家爲光允符李完平相府故事肆當瓊林之重喜爰思錫蕃之特優尊高年自三代以前奚止桓榮之設席敬大臣居九經之序不獨蕭相之給扶載念搢紳所榮厥有几杖之禮烏皮代隱坐之具可資南郭之間憑鳩飾爲祝噓之方亦有東京之美制取其便體謀長者而必操行輒隨身扶老人而可憇純

嘏則頤期遐享殊眷則賁飾昇平躋八耄而致尊尙賴詢猷之黃髮繼二祖而受賜視同舊物之青氈內厨侈九卿之樽筵列槐棘梨園侑一等之樂座設梧藤太史復奏日下之雲台垣並耀弧南之宿於戲卿之扶翊我邦國迄今杖於朝而鞠躬予所倚毗于老成每思几有箴而常日箕疇錫極克贊歛福之休天保答君尙佇獻年之悃故茲教示想宜知悉

回香宣醞謝箋入侍時 內賜

御製 御筆

卿位登台司年踰七耄而琴瑟在御醮期載至三子

皆以官俸供歡觴豆卿家福祿世所罕比真國之嘉
瑞也使人人如卿之壽而得兼今日之會豈不盛哉
予亦望卿之壽而希卿之福矣

回榜宣醞謝箋入侍時 內賜

御製 御筆

領樞今年恰滿八耋日下五雲舊甲重回此誠朝
廷吉祥之事也迺於回榜之日特宣几杖庸寓尊
年之義謹遵 列朝故事以一詩申之

寵宣几杖事光前三達如卿五福全內醞盈盈仙樂
奏簪花重拂曲江筵

壬戌季春下澣

領議政初度呈辭不 允批答

修撰李容
萬製進

王若曰溫音洞諭謂遐心之可回辭單遽陳慨至意
之莫諒其勿困我決不捨卿屬茲國事多艱之時實
非輔相告退之日八域騷繹奈此宵旰之獨勞百度
恬嬉政須老成之共濟垂紳正笏朝野之想望愈深
作楫濟川寡昧之注意斯切惟卿一門十相之闕六
位元輔之任歷事 五朝德望則尤宜詢茲黃髮坐
鎮一世忠直則舉誦不負素心身佩安危郭令公之
中書廿考老益康健文彥博之九耄太師肆當小子

嗣服之初尤切舊人圖任之思致周家康保之化予
有待於今辰贊箕疇會極之治卿已試於宿昔顧此
倚毗之方摯不料請告之猶尋於戲精力雖曰瘡淹
何妨臥閣而論道謨猷自是宏遠惟當體國而忘身
亟斷引疾之章用副如渴之望所辭宜不允故茲教
示想宜知悉

再度呈辭不允批答

製迷官
上同

王若曰前言尙未喻耶冀卿志之可挽此牘奚又至
也愧予誠之莫孚須體心腹之是敷莫曰疾病之難
強惟卿廊廟宿德王室蓋臣平常未嘗有爲施措則

自中規度事務若不經意政令則皆合機要喬嶽泰
山雖不見運用之利巨河大海固已多浸潤之功自
先朝禮待之隆荷殊寵於賜几賜杖逮小子倚畀也
切尊元老而爲著爲龜竊念艱虞之多端政宜賢相
之協贊姚宋爲政則開元之治可稱韓富在朝則慶
曆之化爲盛際今日注意之篤奚啻隣哉臣忝惟古
人盡瘁之誠素著國耳公耳夫何重卜之無幾遽見
再辭之繼尋綠野之休閒旣多政須啓心而資沃黃
扉之機務久滯豈可袖手而旁觀以平昔同休戚之
心宜與我共治顧此時任經濟之策其捨卿而誰須

思幡然改之義母替援而止之圖於戲大臣之責任
不輕固宜去就之自重寡人之期勉斯摯盍念勤勞
之克殫予不再誥卿其三思所辭宜不允故茲教示
想宜知悉

賜祭文

修撰李弼
鎔製進

國有柱石謂是良弼國有著龜謂是黃髮自予嗣服
于卿是毗柱石于是著龜于是英年識拔先王則
哲五朝歷事用茂乃績聽之士論三節炳烺確執
謹言大直大忠餘事文章華國之手金石制作聲施
當世凡厥猷爲學識攸本儲之奎瀛有唐陸宣置之

銓衡有宋文穆在郡召父在藩申伯奉璽則絳正笏
則韓懇懇引君惓惓憂民八授三旌元輔者六家傳
相業粵自文翼忠貞相繼寔爲五公積而又發備福
之享回轡回榜几杖尊年再相嘉禮於古罕見立朝
以來七十載餘宿德重望苑爲領袖矧今彌卻望百
之齡湛露句天將飾昇平豈意无妄忽焉騎箕孰鎮
雅俗孰稽疑事貞亮儉約典型如昨倅官陳酌罄瀉
愴臆

又

製述官
上同

在天星精在地嶽英生有自來在人惟卿蹟卿先美

四相繼作有績紀常忠貞是篤天實錯輔乃卿克紹
若殷咸賢亦周奭虎惟孝惟友卽其性然本之修身
出而事君自載筆初有執已確 先王曰嘉眷顧隆
赫肇軻奎瀛翥華騫清乃侍經幄真淳夫講乃典銓
衡謂山公啓二符四節賦政于外華麥恤民箕銀經
國夜燭丹筆必慎庶獄望儲三館黼黻之章位致兩
府楫礪之用弘猷碩德安危攸佩卓著忠直在內與
戊維已奉璽奠國泰磐凡中書考餘三十年元輔元
老優禮几杖憂愛一念至老愈耿有德必報諸福咸
備賢胤肖孫崇顯有位矧茲人瑞邵齡望百將節盛

事法醞御樂每喜康旺胡天不愆心焉傷盡洞酌斯

陳

又

原任 奎章閣提
學申錫禧製進

河嶽魁衡鍾爲蓋臣敦大博厚秉德忱恂勤相保又
功施炳麟我儀圖之卿惟其人 純祖初元髦英妙
掄卿時策名標望彬彬 五朝耆德心丹髮銀政舉
覈銓才富演綸位遇赫然超絕廷紳三路貳京保釐
來旬椿羨儲胥城庠欽繆欽茲大惠備豫濟屯哀敬
恤刑無枉不伸韋平世業十二秉勻數當于卿安危
佩身黃扉八啓以欽四隣謀體斷論尊主庇民懿是

司直不易欣顰藥啓守經辭嚴誠純謹論匡救匪躬
批鱗謬謬盛節自昔丙寅史草記言非磨可磷卿雖
欲然輿誦惟均勲勩茂著吉祥並臻大璋親迎再贊
虞嬪輪車御天扶日沁津冲人冠首卿實予賓重沓
之歲回榜之辰仙樂具奏法醞維醇玉杖銀卣介爾
冥春凡厥饗用曷無所因維孝維友內行篤肫冠蓋
名里宗黨睦嫻清修儉約圖書凝塵靈著大蔡雪竹
霜筠玉樹芝蘭柯葉蓊蓊衣斑犀韞飴弄朱輪安富
尊榮九十一春壽考福祿汾潞與倫賁飾人瑞熙典
將遵云胡哀單遽徹紫宸人事之變恍夢匪真睠彼

西清職比地親哲嗣賢抱接武閭閭中秘讀書舊甲
重新老成弗憇邈若隔晨爰舉故常哀酌是隤

又

校理趙秉
翊製進

維歲次癸未十月戊申朔初四日辛亥 國王遣臣
地方官始興縣令趙容九致祭于故領議政文忠公
鄭某之墓昔予嗣服有若元臣曰惟文忠間代其人
天實覽德神降于嶽四世相門前光奕焉有文有質
有體而用英年簡拔荷 純祖寵歷 三聖朝位遇
采隆六膺上台逮于寡躬自橐筆初以至中書夷險
終始七十載餘縑素攸紀卓節偉績壹是本諸憂愛

衷赤所以以身爲國之係奉璽于代贊璋于渭予冠
而賓耆德以將備五望百惟善是祥人有恒言必曰
著龜實謂若卿燭理決疑人有恒言必曰柱石實謂
若卿奠安宗國烏几黃髮緬言典型輦路侑庶歆
斯馨

經山集附錄卷三

此我王考文忠公遺稿也王考立朝七十有二年
德行勲業宏偉一代炳烺乎史乘豈特以文章顯
哉然而稿卽德業之餘也宣彰謨猷賁贊聲明
雖短章片辭實有不可以不傳者詩文雜著總二
百卷先考嘗手自編輯擬付梓未就至易簣以是
憾焉小子夙宵不敢忘餘景冉冉精思日耗恐一
朝溘然無以追遺志闡先美而表鉅不能爲役重
加校閱撮爲若干卷用活字擺印僅十之一二耳
藏其餘以俟後日乙未季夏不肖孫範朝謹跋





